



太史范公文集卷第三十

翰林詞草

班荆館賜大遼賀坤成節人使回程御筵
口宣

卿等使華復命郊館留行臨遣近臣特伸飲餞勿辭
既醉用副眷懷今差內侍省內西頭供奉官董溫之
賜卿等御筵想宜知悉

班荆館賜大遼賀坤成節人使回程酒果
口宣

卿等徒馭旋歸山川悠緬抗旃首路柅轄頒恩加錫
芳甘式昭勤厚今差內侍省內侍殿頭王祺賜卿等
酒泉想宜知悉

相州賜大遼賀坤成節人使回程御筵口宣
卿等壽辰展慶瑞節言歸聊息駕於近藩因肆筵於
華館式頒燕衍益示恩榮今差內侍省內侍殿頭梁
敦賜卿等御筵想宜知悉

賜資政殿學士守吏部尚書胡宗愈乞知
揚州不允詔

卿昔在先朝素推體直迺者輔政未幾懇請守藩
西蜀宣布流聞甚美以卿舊德宜在朝廷入長天官
民望攸屬夫賢人進退繫國重輕而以私恤遽求外
補春秋之義不以家事辭王事姑安厥位以副眷懷
所請宜不允

賜觀文殿大學士集禧觀使蘇頌乞致仕

不許詔

祖宗以來貴德尚齒鼎槐之老莫不眷留班于大廷
表儀百辟卿向繇省轄進涖宰司深執勞謙懇求去
位置使祠館勉徇雅懷已退處於邱園尚何殊於田
里矧卿筋力克壯聰明不衰中外所瞻足以重國體
茲至意無或費辭所請宜不許

不允詔

古者三公在朝三老在學或坐而論道或就而咨謀
身雖佚休不離王室降及後世則異於斯以蟬蛻軒
冕為高以屣遺祿位為潔卿多識前世之載雅意本
朝之隆君臣之交禮義相與乞身之請姑務少安所
請宜不允

賜龍圖閣學士知瀛州曾布乞揚州不允詔
卿昔在先朝服休侍從宣力中外靡憚勤勞南臨
長沙實濟師役西控青海以威羗戎眷言老成付以
北道疆場無事使傳相望緩帶雅歌足以綏靖忽覽
封奏欲求便藩尚當勉留以副寄委所請宜不允

賜宰相呂大防上劄子乞罷不允詔

省所劄子奏重任久次今茲譴戒所加殆緣臣致伏
望獨罷事具悉朕恭聞 仁宗皇帝因讀前史嘗諭
侍臣漢以災異策免三公莫若罪己以荅天責 皇
祖有訓禹湯格言朕承宗祧敢不祗服卿位上宰歷
年于茲乃以譴戒之來獨祈罷免移過於下非予所
聞勉思銷復之宜毋重朕之不德所請宜不允

賜宰相呂大防等為雨水乞降黜不允詔
省所劄子奏伏見雨水過常害及民物皆由充位無
補致此災譴伏望特賜降黜事具悉常雨為災歷時
不已雖竭精禱未蒙神休陰陽失和衆庶被害側席
思咎殆天儆予寔賴左右輔臣交脩不逮卿等躬任
變理志同憂勞雖引責抗章義深懇惻而遽請避位
予何倚毗惟先格王飭已正事不聞歸罪股肱大臣
當體至懷共圖救政所請宜不允

賜蘇頌第二表乞致仕不許詔

昔衛武耄老猶聞箴儆之言方叔壯猷實繫顯允之
德卿已謙避宰席退領祠宮以時造朝精力未艾黃
髮在位重於典刑雖嘉知止之風且異尚賢之意勉

綏厥服以副眷懷所請宜不許

不允詔

輔弼之仕體貌所隆進退之宜輕重攸繫卿亮采三事施勤四方圖任舊人久勞於共政賓禮故老尚賴於咨謀而累抗封章願還印紱於卿為美非朕所安所請宜不允

賜資政殿學士許將免知揚州乞便卿一郡不許詔

卿自仁皇之末首冠多士宣力中外服在近僚向解機務出分邊寄及此歸成改藩東南而累抗奏封懇祈鄉郡過家上塚雖懷桑梓之至情憂國忘私宜體朝廷之重委往即乃治無或故辭所請宜不許

不允詔

昔申伯于蕃用寧周室貢禹懷土終老漢廷蓋邦家唯欲得賢則人臣豈可自便卿入位丞轄出總戎麾身雖侯方心在王室而近辭淮海遠請甌閩求之故常未有此比祇服成命以副眷懷所請宜不允

賜皇叔徐王辭免乘檐子至下馬處不允詔
省所劄子奏許乘檐子至下馬處伏望特賜免罷事具悉叔父東德位冠宗藩入侍慈闈宜有優禮惟子冲人方以孝愛順天下其敢弗欽肩輿造朝矧有故事深執謙退當體眷懷所請宜不允

大相國寺大殿上開啓謝晴道場齋文
伏以常雨為沴下民其咨祇竭精誠仰祈妙覺天地

歛氣山川收雲清風特興白日顯照爰脩法會庶荅
慈恩

上清儲祥宮開啓謝晴道場青詞

伏以常雨為災歷時不已肅將誠懇仰扣清虛陰沴
廓消離明迴照顧惟南畝尚有西成祇案真科用昭
靈貺

又朱表

迺以霖雨害及下民夙夜不寧永思愆咎輒瀝誠懇
仰籲穹昊惟神降休時暘協應顧茲寡昧曷動高明
祇達清場上荅鴻施

故贈開府儀同三司駙馬都尉李瑋堂祭
文十五日

惟靈 章懿近屬 仁祖副車王姬築館蚤膺選尚寵
榮福祿累紀于茲旌節在門以候就第奄終壽考深
用盡傷特設奠筵庶昭恩禮尚饗

又下事祭文

惟靈外戚舊侯奉車 帝壻四朝寵遇遂擁節旄康
寧考終奄及襄事褒贈之典視穉三公侑以奠觴慰
茲幽窆尚饗

又舉靈前一夕祭文

惟靈位為戚藩居列主第富貴壽考哀榮始終訃音
初聞趣駕臨奠葬期奄至遣使護喪既啟敢塗將及
祖載侑以肴醴慰茲營魂尚饗

太廟逐室各津漏及滴濕神帳奏告僖

祖皇帝等祝文

伏以寢廟有嚴威神所宅歲時既久風雨寢墮攸司
庀工揆日祇事敢不虔告用昭孝誠尚饗

賜資政殿學士新除守戶部尚書李清臣

茶藥口宣

卿夙贊鈞衡久臨蕃屏已趨召節入長地官行涉暑
塗宜綏福履特加問賚當體眷懷今差入內侍省
內東頭供奉官徐湜賜卿茶藥兼傳宣撫問想宜知
悉

內外神廟開啓消災祈福道場祝文 二十三

伏以崇慶至仁溥天共 勤勞成疚治療未平遍款
靈祠仰祈休應所冀拔除災疾降集福祥永庇羣生

益隆萬壽尚饗

五嶽開啓消災祈福道場青詞

伏以天祚有德神享至誠 太皇太后保佑眇躬焦
勞庶政偶嬰疾疾未底和平是以夙夜靡遑齋明歷
禱惟神望于秩典庇此生民其克相於慈闈永綏安
於壽祉

太皇太后服藥消災祈福金籙隨場青詞

臣夙以眇躬嗣膺大統實賴 太皇太后保育冲菲
扶持艱危歷年于茲其德惟一至靜能久天公無私
天地之所鑒知華夷之所愛戴焦勞邁疾治療未平
臣冰淵戰兢夙夜憂慄是用載洎秘殿申救輔臣案
金籙之真科祈璇穹之寶命伏冀三清教父衆聖天

宗敷佑 宋邦介福 文母勿藥有喜獲濟於屯災
無疆惟休永綏於壽祉

又朱表

上帝景命既申錫於 宋邦冲人眇躬實仰賴於
文母自總臨於庶政惟思濟於羣生無毫髮之私神
天所鑒有慘怛之愛億兆歸心久積憂勤屬嬰疾疾
臣夕惕惟厲啟處不遑是用請命皇穹呼窮元父仰
惟福善助順悲忱益謙拯其艱厄之虞降以康寧之吉
太皇太后服藥奏告天地宗廟社稷祝文
伏以 太皇太后擁佑眇躬救寧方夏勤勞邁疾治
療未瘳心之憂危靡所底告謹擇良日請命天神伏
惟昭鑒精衷曲垂靈貺庶有感格以速和平尚饗地皇

祇云請命文祇 宗廟云請命宗祊
社稷云請命于神

故贈永嘉郡夫人王氏堂祭文 二十八日

惟靈服在內庭奉循法度祇勤夙夜靡有愆違遽隕
厥身乃加追命將殯之夕送以奠觴尚饗

又墳所祭文

惟靈序職宮闈其儀令淑生有禮秩沒有恩榮遣奠
最塗致我誠惻尚饗

延福宮穆清殿開啓上祝 太皇太后消
災集福道場朱表九月

上神孚佑降監孔昭洪造何言至誠必應顧惟眇質
獲奉丕基仰繫崇慶之仁大庇羣生之命偶乖和豫
寔自勤勞是以惕厲薰心齋明滌慮告虔淨宇薦信

穹昊延集福祥被除譴咎所冀勿藥有喜遄底康寧
無疆惟休永膺壽考

賜諸道州府告諭勅書

敕真定府官吏軍負將校僧道百姓等上天降災九
月三日 大行太皇太后奄棄四海道揚遺命顧念
眇躬摧毀荒迷未知所濟咨爾有衆務安厥常以副
朕哀諭之意故茲告諭想宜知悉

崇慶宮開啟 大行太皇太后初七水陸

道場齋文 八日

伏以功被寰區登真不返法周沙界應供無邊式陳
哀薦之誠大啟等慈之會冀憑妙界仰奉靈游

皇帝為 大行太皇太后成服祭告祝文昨

昊天降凶四海喪妣攀號罔極至痛無文初被縗麻
式陳哀薦以今日成服不敢不告尚饗

賜文武百寮請聽政第一表不允批答

昊天降禍 大行太皇太后奄棄萬方朕以眇末之
身孀孀在疚元窮永慕未知攸為而公卿大夫遽以
聽事為請夫三年之喪方處苫廬未易縗服乃欲臨
便坐見羣臣其可得乎所請宜不允

賜文武百寮第三表請聽政不允批答

朕遭家不造蚤失 先帝寔賴 太皇太后保佑眇
躬勤勞艱難于茲九載大德未報奄及升遐悼心失
圖銜恤在疚卿等乃迫以遺誥奪其哀情雖一日萬
機理難久曠而終天至痛力未能勝母遽執於權宜

庶獲專於喪紀所請宜不允

大行太皇太后二七於崇慶宮設九幽醮
青詞十五日

伏以慈顏未隔颺馭不留欲報之勤追攀罔極載嚴
禁宇祇建清場覬憑真聖之靈上濟仙遊之路願回
昭監深諒精誠

賜文武百寮請聽政第五表不允批荅

昔高祖^宗三祀亮陰不言滕文五月未有命戒朕自嬰
荼苦方此逾旬哀疚在心縗麻在體欲言國政所未
忍也而况三事大夫服勞夙夜百司庶尹率由典常
官不易方朝無廢事當少伸朕志毋奪喪焉所請宜
不允

太皇太后山陵務從節儉詔

朕恭以。大行太皇太后保 祖宗之基命定社稷之
永圖德參二儀功冠千古憂民慘怛如肌体之有傷
克己公清無私毫之自奉今普天喪恃四海同哀雖
築陵高於太山備禮殫於萬物顧無以報亦未為多
惟遵奉於訓言益光昭於儉德以對在天之盛烈以
揚愛物之遺仁緣山陵非久脩奉深慮有司過有煩
勞枉費人力不能仰承遺誥務遵儉省之意其令尚
書戶部斟酌轉移應副毋得寬剩計置除京西路轉
運司自合供辦其諸道非特降毋得妄有進助咨爾
中外當體朕懷

大行太皇太后殿蕞祭告祝文 二十一日

伏以音容永隔服御如存龜筮協從日月流連愛依
正寢祇設菽宮光靈在天攀號罔極尚饗

賜文武百寮請聽政第七表俟終易月之
制批荅

朕惟先王制禮稱情立文君子居喪與易寧戚以日
易月斷恩從權 祖宗以來亦未違改朕外遵遺訓
內服通喪雖三年不言仰企前哲而公除聽政抑有
舊章卿等疊抗奏封備殫懇款朕承宗廟之重所不
得辭強抑至情興言摧切宜勉從來請俟終易月之
制委有司定日施行

崇慶宮開啓 大行太皇太后三七水陸
道場齋文 二十二日

伏以真馭不留慈顏永遠仰憑覺力追奉靈游祇被
禁塗大陳法會庶集無邊之福用資不測之神

大行太皇太后大祥祭告祝文 二十七日

創鉅難任終天永痛祥除奄及易月有期瞻慕几筵
式陳哀薦尚饗

十月朔資薦 大行太皇太后於福聖禪
院作水陸道場齋文

伏以仙游永遠日御遄流履霜露以增哀想音容之
如在仰憑妙覺祇薦真靈恭即仁祠大陳法會庶緣
勝果用助遐升

皇帝達 大行太皇太后與大遼皇帝遺
留書

十月 日姪孫大宋皇帝謹致書于叔祖大遼聖文
神武全功大略聰仁睿孝天佑皇帝闕下閔凶如昨
荼苦至深奉慈幄之遺言達寶鄰之永信特馳使介
往致物儀今差龍圖閣直學士左朝散大夫上護軍
河東縣開國子食邑五百戶賜紫金魚袋呂陶西京
左藏庫使兼閤門通事舍人上騎都尉太原縣開國
伯食邑七百戶郝惟立充 大行太皇太后遺留禮
信使副其禮物具諸別幅專奉書不次謹白

大行太皇太后遺賜南平王李乾德衣物

示諭敕書

敕南平王乾德昊天不弔崇慶上賓迺眷海邦世修
藩職奉諱之日銜恤所均申錫遺恩仰承先旨益肩

忠順庸副誠懷今 大行太皇太后遺賜卿對衣金
腰帶銀絹鞍轡馬等具如別錄至可領也

賜夏國主告諭遺留詔

詔夏國主上天降禍 大行太皇太后奄棄宮朝爾
自續世邦早膺恩錫雖畫疆保塞久未訖於溝封然
悔過上章比已馳於使介仰承慈旨終軫嗣藩緬惟
奉諱之辰同切摧情之慕今差供備庫使曹譜齋賜
天行太皇太后遺留銀絹具如別錄至可領也

皇帝賀大遼皇帝正旦書

正月一日姪孫大宋皇帝謹致書于叔祖大遼聖文
神武全功大略聰仁睿孝天佑皇帝闕下歲歷更端
方春陽之發育鄰邦繼好宜壽祉之綏將善頌所深

名言昌既今差左朝散大夫守祕書少監上護軍河東縣開國男食邑三百戶賜紫金魚袋呂希績供備庫使上騎都尉贊皇縣開國男食邑三百戶季昌世充正旦國信使副有少禮物具諸別幅專奉書陳賀不次謹白

賜文武百寮請御正殿第一表不允批荅朕嗣位以來仰恃崇慶同御便殿端拱蒙成不圖閔凶遽失慈訓哀慕慌惚警欵如存迫於羣言勉力聽政雖終易月之制方執三年之喪前臨正朝寔所未忍興念及此心焉若摧所請宜不允

昔我 仁祖神考追孝 二后感格天地通于神明

垂裕後昆永錫厥類朕庶幾程式率而行之執喪致哀圖報罔極卿等雖志在家國其亦以禮愛君俾予一人無忝 祖考所請宜不允

太史范公文集卷第三十

太史范公文集卷第三十一

翰林詞草四

崇慶宮開啟資薦
大行太皇太后道場
盡七齋文 二十一日

伏以坤儀永謝日御遄流追罔極之深恩修等慈之
妙教禁塗載闢法會無遮庶憑十力之勝因上濟九
天之僊路謹言

三陵上官并諸后位及諸王等神臺值霖
雨塗皮脫落下手添脩奏告 帝后表文
伏以神靈所宅陵寢載嚴風雨侵尋塗丹剝落將加
完飾罔敢輒興爰擇吉辰是用虔告

大行太皇太后山陵封山斬草動土興工

祭告五帝祝文 二十六日

恭以 大行太皇太后臨朝九年嘉靖四海昊天不弔厭代登遐山陵有期龜筮獻兆爰得吉穴祔于厚陵鳩工使徒將集大事練此時日肇興上功惟神之休隆佑在下安固真宅億萬斯年與 宋無極敢用虔告尚饗

大行太皇太后山陵封山斬草奏告諸陵帝后表

伏以 先后在天崇丘卜壤練此吉日作于新宮乃與工徒將啓兆域虔告陵寢用嚴威神謹差右朝散郎臣邢端奉表奏告以聞

故魏王鄧國蔡國公主墳斬草破地祭告

五方帝并后土等神祝文

伏以 先后山陵帝子從祔考卜幽宅圖惟永寧託神之休是用虔告尚饗

皇帝御正殿祭告大行太皇太后文 十一月

伏以日月遄流慈顏永遠夙夜哀慕不敢違寧羣臣抗言統業至重已即便坐躬攬萬微當臨正朝時見百辟勉從衆論增愴五情臣以今月二日御正殿不敢不告尚饗

賜資政殿學士新除知大名府許將辭免不允詔

朕以全魏別都國之巨屏大河決溢烝民流離慘怛於心哀此鰥寡思用舊德往拊一方以卿歷典藩垣

夙陪機政特輟東南之寄庶無朔易之憂當體眷懷
勿為遜避所請宜不允

撫問涇原路臣寮口宣

卿等宣力塞垣服勞王氏履茲寒律簡在予衷存問
有加眷恩斯厚今差東頭供奉官曹允則傳宣撫問
想宜知悉

諸路走馬赴闕奏覆回傳宣撫問本路臣
寮口宣

卿等為國蕃宣自公夙夜眷言外服簡在予衷存問
有加恩勤斯至今差西頭供奉官張彥孫傳宣撫問
想宜知悉

賜樞密直學士簽書樞密院事劉奉世辭

免生日生餼不允詔

輔翼之臣禮有慶賜茲為故事不可一日而廢也朕
方銜恤而有司舉典夫何足辭所請宜不允

白溝驛賜大遼賀興龍節人使御筵口宣

卿等載馳原隰適及溝封眷言行李之勤方屬祁寒
之候爰加郊勞以示寵私今差某官某賜卿等御筵
兼傳宣撫問想宜知悉

趙州賜大遼賀興龍節大使茶藥詔

皇華將命瑞節在塗加異品之榮頒慰祁寒之行役
式昭眷寵以助保綏今差入內內侍省內侍殿頭楊
珪往趙州賜卿茶藥具如別錄至可領也

趙州賜大遼賀興龍節副使茶藥詔

上介展儀命圭申信眷風霜之嚴冽頒薜劑之珍良
慰乃勤勞體予恩渥今差入內內侍省內侍殿頭楊
珪往趙州賜卿茶藥具如別錄至可領也

賜觀文殿大學士新差知揚州蘇頌再辭
免知揚州不允詔

朕以東南之寄淮海為重思用舊德惠綏一方與其
引逸於祠官曷若均勞於侯服尹茲揚土以屏王家
尚賴仲山之將明庶聞衛武之箴儆所請宜不允

賜北京等路臣寮中冬衣襖口宣

卿等職在外服時方大冬用均安煥之恩以慰勤勞
之念欽承寵賚益休眷存今差學士院待詔段從易
賜_{汝卿}等中冬衣襖想宜知悉

賜安武軍節度使知太原府韓鎮進馬詔
省所進奉謝南郊禮畢奏薦子孫恩澤馬二匹事具
悉卿鼎槐舊老藩閫元侯因推延世之恩來效充庭
之貢眷言忠蓋良用歎嘉

賜龍圖閣直學士知成都府蔡京進馬詔
省所進奉謝恩授龍圖閣直學士馬一匹事具悉卿
輟守雍部總麾劔川進陞內閣之華來效外閑之貢
眷惟勤蓋良用歎嘉

趙州賜大遼賀興龍節使副茶藥口宣
卿等恭持信幣方次中塗爰有恩頒以慰行役欽承
眷渥用助保綏今差入內侍省內侍殿頭楊珪賜
卿等茶藥想宜知悉

相州賜大遼賀興龍節使副御筵口宣
卿等肅持使節來會誕辰涉歷山川少休徒御式頒
燕衍用示恩私今差入內侍省內侍殿頭闕琳賜
卿等御筵想宜知悉

白溝驛賜大遼賀正旦人使御筵口宣

卿等踐脩久好衝涉祁寒興言行役之勤用錫燕林
之禮體茲眷寵懋乃使華今差某官某賜卿等御筵
兼傳宣撫問想宜知悉

撫問太原府代州等路臣寮口宣

卿等為國蕃宣在公夙夜方冬寒冽言念勤勞當體
眷懷俾加存問今差入內侍省內東頭供奉官裴
彥臣傳宣撫問想宜知悉

崇慶宮冬至資薦 大行太皇太后設醮

青詞 二十三日

伏以日月邁邁霜露荐臻銜追遠之深哀感迎長之
新令載嚴禁宇大講科儀庶憑真勝之靈上濟仙遊
之駕永垂道蔭常祐寶圖無任懇倒之至

撫問接伴大遼賀正旦人使副口宣

卿等載馳華隰遠迓使旌蒙犯風霜勤勞夙夜唯宜
尚慎以副予懷今差某官某傳宣撫問想宜知悉

撫問大遼賀正旦人使口宣

卿等踐脩久好來會元正川陸塗遙風霜氣冽宜勤
調護以副眷存今差某官某傳宣撫問想宜知悉
賜尚書右僕射范純仁乞除一間局或小

郡不允詔

朕宅憂三祀深慮萬微方倚老成共圖政治卿昔以人望延登宰司召自輔藩復還揆路于茲未幾日竝謀猷乃以前有小言引咎自列弼臣進退為國重輕其亟起就位以副朕簡注之意焉所請宜不允

班荆館賜大遼賀興龍節使副到闕御筵
口宣

卿等載馳華隰已次近郊少憇使旃特頒燕豆勿辭既醉尚體至恩今差內侍省內侍殿頭孫承禧賜卿等御筵想宜知悉

就驛賜大遼賀興龍節使副銀鈔鑼唾盃
孟子錦被褥等口宣

卿等並飭使車方休賓館備精金之用器製華錦之寢衣慰薦良勤眷懷斯厚今差內侍省內東頭供奉官鄧友直賜卿等銀鈔鑼唾盃、子錦被褥等想宜知悉

興龍節賜殿前太尉以下罷散道場香口宣
卿等翊衛竭忠誕彌均慶預嚴淨會以薦壽祺及此告成宜加寵賚今差內侍省內侍高品衛克忠賜卿等香想宜知悉

賜大遼賀興龍節人使朝見訖歸驛御筵
口宣

卿等肅將瑞節已致慶函方適館以少休特肆筵而示寵茲為勤厚當體眷懷今差內侍省內侍殿

頭梁隱賜卿等御筵兼差通議大夫知樞密院事上
桂國韓忠彥押伴想宜知悉

興龍節賜知樞密院事以下罷散道場香
口宣

卿等樞機之臣社稷是衛夙設人天之供共祈箕翼
之祥宜有寵頒用昭眷遇今差內侍省內侍殿頭王
祺賜卿等香想宜知悉

十二月七日就驛賜大遼賀興龍節人使

內中酒果口宣

卿等命主脩好信幣展儀頒禁宇之芳甘飾賓筵之
燕喜用昭殊遇當體至恩今差入內侍省內侍殿
頭康承錫賜卿等內中酒果想宜知悉

賜大遼賀興龍節人使不射弓例物口宣
卿等並膺藝選來展使華適當徹樂之辰難舉射侯
之禮特加賚予以示眷勤今差入內侍省內侍殿
頭羅宿賜卿等射弓例物想宜知悉

就驛賜大遼賀興龍節人使不宴御筵口宣
卿等夙駕星輶來趨壽節屬在過音之旦莫伸折俎
之儀就錫燕私用昭寵遇今差入內侍省內侍殿
頭羅宿賜卿等御筵兼差樞密直學士中大夫簽書
樞密院事劉奉世押伴想宜知悉

興龍節賜徐王罷散道場香口宣

惟我叔父作藩皇家鑣蒲塞於祗園祝椿齡於誕日
既成法會宜有寵頒今差內侍省內侍黃門王備賜

卿香想宜知悉

賜大遼賀興龍節人使朝辭訖歸驛御筵
口宣

卿等聘儀已事辭謁言歸少留舍館之安特賜賓筵
之寵用將誠意以慰勤勞今差入內侍省內侍殿
頭王佐賜卿等御筵兼差太中大夫守門下侍郎蘇
轍押伴想宜知悉

班荆館賜大遼賀興龍節人使迴程酒果
口宣

卿等抗旌歸路脂轄近郊念川陸之阻脩眷冰霜之
嚴冽特頒芳旨用示恩私今差內侍省內西頭供奉
官張翬賜卿等酒果想宜知悉

太廟添脩石室奏告

僖祖 宣祖 太

祖 太宗 真宗 仁宗 神宗皇帝祝

文述以添脩石室之意 十二月

於穆清廟 列聖在天思齊太任 皇祖合食神宮
有血石室肇修虔遵舊章不敢不告尚饗

太廟奏告 英宗皇帝祝文

伏以祔陵涓日配主有期增廣祖筵奉嚴廟室儔功
經始祇率舊章昭鑒在天不敢不告尚饗

瀛州賜大遼賀興龍節人使回程御筵口宣

卿等聘事告成還車言邁改轅北道弭節近闕眷言
行役之勤宜有燕私之寵今差內侍省內侍殿頭蔣
維恭賜卿等御筵想宜知悉

雄州賜大遼賀興龍節人使却迴御筵口宣
卿等徒御旋歸山川悠緬雖不違於啓處諒無爽於
保頤特錫燕休仍加問勞今差內侍省內侍殿頭孫
承禧賜卿等御筵想宜知悉

趙州賜大遼賀正旦大使茶藥詔

歲歷更端使輶講好眷星霜之夙駕有萍劑之榮頒
綏乃冲和副茲優渥今差入內侍省內侍殿頭馮
說往趙州賜卿茶藥具如別錄至可領也

趙州賜大遼賀正旦副使茶藥詔

使華將命介紹展儀眷言行役之勤宜有恩頒之厚
尚綏乃履以副予懷今差入內侍省內侍殿頭馮
說往趙州賜卿茶藥具如別錄至可領也

班荆館賜大遼弔慰人使到闕御筵口宣

卿等夙馳星駕來會喪期已次近郊少休賓館特頒
燕勞當體誠懷今差內侍省內西頭供奉官石琦賜
卿等御筵想宜知悉

班荆館賜大遼皇帝祭奠人使酒果口宣

卿等載馳原隰來奠宮朝密邇都城少休郊館特加
頒賚用示眷存今差內侍省內西頭供奉官李世長
賜卿等酒果想宜知悉

班荆館賜大遼祭奠人使到闕御筵口宣

卿等肅馳使傳來奠皇儀近望國門少休郊館宜頒
燕犒用示寵私今差內侍省內侍殿頭孫承禧賜卿
等御筵想宜知悉

雄州賜大遼弔慰人使回程御筵口宣
卿等奉將使指來展弔儀載整歸驂已臨邊圉宜頌
燕勞用示寵私今差內侍省內侍殿頭王懷敏賜卿
等御筵想宜知悉

接伴大遼弔慰人使送伴回程汧路與賀
大遼正旦使副回相逢傳宣撫問口宣

卿等持節出疆抗檀復命蒙犯霜露跋履山川言念
勤勞俾加存問今差某官某傳宣撫問想宜知悉

接伴大遼弔慰人使送伴回程汧路與大
遼賀正旦人使相逢傳宣撫問口宣

卿等輶軒將命瑞節講儀蒙犯風霜馳驅原隰俾伸
問勞當體眷懷今差某官某傳宣撫問想宜知悉

趙州賜大遼賀正旦使副茶藥口宣

卿等並驅星駕載涉冰塗乃眷勤勞特加賚予宜膺
寵渥用助綏將今差入內內侍省內侍殿頭馮說賜
卿等茶藥想宜知悉

相州賜大遼賀正旦人使赴闕御筵口宣

卿等抗檀遠道弭節近藩少留舍館之安宜有肆筵
之寵用昭眷渥以慰勤勞今差入內內侍省內侍殿
頭王端賜卿等御筵想宜知悉

班荆館賜大遼賀正旦使副到闕酒果口宣

卿等駟騑夙駕來脩上日之儀醴寔時珍往致近郊
之勞茲為勤厚當體眷存今差內侍省內西頭供奉
官李世長賜卿等酒果想宜知悉

班荆館賜大遼賀正旦使副到闕御筵口宣
卿等馳驅川陸蒙犯風霜近望都城少休郊館式頒
燕衍用示恩私今差內侍省內侍殿頭王祺賜卿等
御筵想宜知悉

賜大遼賀正旦使副生餼口宣

卿等肅持華節已奉信書方賓館之賜休俾行人之
致餼茲為加勞當體渥恩今差入內內侍省內侍殿
頭馮說賜卿等生餼想宜知悉

大行太皇太后謚號冊寶奏告天地景靈
宮等處青詞祝文二十四日

伏以議行誅功請于宗廟尊名節惠質之神天乃
勒鴻休奉薦寶冊恭舉舊典以今月二十六日上

大行太皇太后尊謚曰宣仁聖烈皇后不敢不告
尚饗

大行太皇太后謚號冊寶奏告宗廟社
稷祝文

伏以姜任之功社稷是賴受謚于廟配祖在天乃勒
鴻名奉薦寶冊虔遵舊典以今月某日上大行太
皇太后尊謚曰云云

景靈宮奉安太皇太后神御詔

朕惟神宗皇帝大新館御追孝祖宗合原廟之
睟容萃景靈之吉壤大行太皇太后每思克已唯
務恤民特於元祐之初預敕永終之制避神皇之
宣寢從英祖於治隆仁愛之深與天無極謙光之

美振古未聞今將先遠橋山升祔宗祏載嚴像設以
奉神游敢祇率於訓言用述成於聖志咨爾中外當
體朕懷將來景靈宮奉安 太皇太后神御衣
元祐元年正月二十六日手詔施行

撫問脩奉官姚麟以下口宣

卿等營奉先寢時方大冬蒙犯雪霜勤勞夙夜眷言
忠力深軫誠懷臨遣使人往伸存問今差入內侍
省內東頭供奉官許日宣傳宣撫問想宜知悉
賜尚書右僕射范純仁辭免弟純禮樞密

都承旨不允詔

省所劄子奏辭免弟純禮樞密都承旨伏望特除在
京一閒慢差遣事具悉古者盛治之世惟才是用父

子兄弟並列於朝苟存至公不事形迹朕方仰成宰
輔推委誠心庶幾君臣不愧古昔純禮承宣樞幄於
卿夫復何嫌載覽來章非予所望勿為疑慮當體眷
懷所請宜不允

賜新除尚書吏部侍郎王欽臣辭免不允詔
天官亞卿古之小宰攝職而授圖惟得人卿以文雅
自將歷更省部已試之效僉曰汝諧疇其久勞寵以
真秩往服成命毋庸遜辭所請宜不允

賜新除戶部侍郎王覲辭免不允詔

朕以六卿之貳難於用人故攝職而授以圖其效考
實而進以勸其能卿歷踐臺省嘗參侍從頃由憲部
暫處地官僉言汝諧寵以真秩往服成命勿為謙辭

所請宜不允

賜禮部侍郎孔武仲乞江淮一郡不允詔
卿以履行文學為時名儒剛毅近仁質直好義春官
之貳邦禮是司宜在朝廷時聞議論迺引微疾遽求
外補非所望也姑安厥位以副眷懷所請宜不允

太史范公文集卷第三十一

太史范公文集卷第三十二

翰林詞草五

崇慶宮為

大行太皇太后正旦設水陸

道場齋文九年

伏以颺馭賓天望珠襦而永遠星杓紀歲驚玉歷之
更新履濡露以摧心依真乘而追福崇嚴清供蠲潔
至誠仰祈妙覺之慈升濟僊游之路謹言

賜大遼賀正旦使副正月一日慰畢就驛

御筵口宣

卿等踐脩久好來會元正已將命於外朝宜肆筵於
公館昭予眷厚慰乃忠勤今差某官某賜卿等御筵
兼差某官某押伴想宜知悉

賜大遼賀正旦使副正月一日慰畢就驛
酒果口宣

卿等展幣執圭已勤使事盈樽實篚加錫時珍用示
誠懷茲為眷禮今差某官某賜卿等酒果想宜知悉

正月五日賜不宴御筵口宣

卿等青陽肇節華隰講儀適當撤樂之辰就錫示慈
之燕勿辭既醉當體至恩今差某官某賜卿等御筵
兼差某官某押伴想宜知悉

正月五日賜不宴酒果口宣

卿等駢駢在館不忘啓處之勤觴豆燕賓爰有芳甘
之錫式將厚意宜服渥恩今差某官某賜卿等酒果
想宜知悉

六日就驛賜大遼賀正旦使副朝辭訖御
筵口宣

卿等來脩聘事已上謁辭惟信宿之少留將旋歸而
言邁宜頒燕衍用示恩勤今差某官某賜卿等御筵
兼差某官某押伴想宜知悉

賜朝辭訖歸驛酒果口宣

卿等奉辭文陛歸整華駢豈無置醴之優宜有加邊
之厚特頒芳旨用助燕私今差某官某賜卿等酒果
想宜知悉

相州賜大遼賀正旦使副回程御筵口宣

卿等抗檀歸路弭節近藩涉卉木之載榮念山川之
云遠宜頒飲御以慰賓勞今差某官某賜卿等御筵

想宜知悉

瀛州賜大遼賀正旦使副回程御筵口宣
卿等聘圭復命使節敬闕眷言行役之勤用錫燕私
之厚少留歸馭當醉湛恩今差某官某賜卿等御筵
想宜知悉

皇帝廻大遼賀正旦書

正月 日姪孫大宋皇帝謹致書于叔祖大遼聖文
神武全功大略聰仁睿孝天祐皇帝闕下歲歷更端
導春陽之發育鄰邦繼好馳使乘以皇華厚幣展儀
信書致問永惟敦睦第切感悰今泰州觀察使蕭禮
等廻專奉書陳謝不次謹白

賜五臺山十寺僧正省奇等進奉功德疏

獎諭敕書

省所進奉興龍節并新正功德疏事具悉誕辰頌壽
元歲祈祥誠脩奈苑之儀疏上彤庭之貢覽其勤悃
良用嘆嘉今賜省奇等紫僧衣一對絹二十疋故茲
獎諭想宜知悉

賜知樞密院事韓忠彥乞降黜不允詔

朕聞先王作罰兄弟無相及之罪嘉彥之責卿何所
疑當體至懷復于而位所請宜不允

賜知樞密院事韓忠彥待罪不允批荅

卿元勲之後登翊近樞歷年于茲一節匪懈嘉彥以
卿同氣為國懿親戚寔自貽罪無相及抗章引咎深
用撫然當體眷懷勉綏厥位所請宜不允

賜尚書右丞鄭雍生日詔

日底營室月維孟春篤生良臣作我右輔用錫爾祉
俾壽而臧今賜卿生日羊酒米麵等具如別錄至可
領也

故蔡國長公主奉先禪院啓攢於攢堂前

開啓資薦道場齋文

伏以娥皇慧質夙為降渚之游善逝法身普現隨方
之應爰因啓窆追薦往生覬憑妙覺之慈永濟超升
之路謹言

故魏王拆攢祭文

維元祐九年歲次甲戌正月癸酉朔十日壬午 皇
帝遣某官某致祭于故魏王之靈維靈 英宗愛子

神考友弟惟予季父敢忘尊禮龜筮言吉敢塗告啓
心焉孔疚侑以肴醴尚饗

故魏王興靈前一夕夜祭文

先后上賓賢王從祔 祖宗之原鞏洛之路靈輶嚴
駕卹典告具致此遣奠展予誠素尚饗

故魏王大葬前一夕夜祭文

惟靈秉德宗藩夾輔帝室自我不見于今七年從祔
原陵即安宅兆遠日之夕饋奠有儀尚饗

故魏王下事祭文

昔周成王追念叔父俾其子孫世紀于魯在漢章帝
感恩東平處存人亡哀不勝情今予季父永歸窀穸
奠以送之義兼古昔尚饗

故鄧國蔡國長公主拆攢祭文

惟靈寶婺儲精璿源毓慶降年不永卜日有期爰啟
最塗將歸宅兆侑以奠禮展予至情尚饗

故鄧國蔡國長公主興靈前一夕夜祭文

惟靈淑質幼成穠華夙隕將從 先后往祔 西陵
明發啓行奠觴以訣尚饗

故鄧國蔡國長公主大葬前一夕夜祭文

惟靈王姬之美未成肅雍帝妹之貴永違元吉 厚
陵從祔日月告期爰稽舊章是用尹祭尚饗

故鄧國蔡國長公主下事祭文

金粟之原 神皇是宅蒼梧之野帝子所遊永閔幽
宮酌觴告訣尚饗

故貴妃苗氏充儀陳氏拆攢祭文

爰命太史考卜吉辰乃啓最塗即安宅兆式陳饋奠
以示哀榮尚饗

故貴妃苗氏充儀陳氏下事前一日祭文六月

遠日惟良卹典告備將以明發適于幽宮魂而有知
歆此遣奠尚饗

故貴妃苗氏充儀陳氏下事祭文 七月

爰備禮儀厚終襄事載寧體魄永固萬年酌此奠觴
惟以安侑尚饗

崇慶殿開啓 大行太皇太后發引前二

日道場齋文

伏以慈顏永遠真馭不留大事請期西階啓殯仰憑

覺力追奉靈游消被禁塗祇陳法會庶集無邊之妙
善以資不測之至神謹言

大行太皇太后靈駕發引 皇太后日奉
起居表

正月十七日

龍輜取道鳳翥戒行萬旅畢從百神來護恭惟 大
行太皇太后厚德載物至仁代天正座臨朝已致九
年之治佳城卜兆遽臨七月之期攀慕無從哀摧罔極

十八日

幽宮協吉已占龜洛之都靈駕祖行寢遠鳳城之地
恭惟 大行太皇太后憂勤祖業燕翼孫謀成化始
基方詠周詩之雅流陰易度忍聞楚挽之悲引望光

靈第深悲隕

十九日

路指漢陵已隔旌旗之望風回魏闕空聞笳吹之聲
恭惟 大行太皇太后德參二儀功冠千古聖如文
母實隆周室之基化若華胥俄返軒臺之馭追攀何
及隕涕無窮

二十日

金旌風轉畫翥星陳想六列之徐驅度三川而益遠
恭惟 大行太皇太后接統千載臨朝九年日月之
照無私乾坤之功不有方專美於彤史遽上賓於白
雲緬想行輿尚陳哀牘

二十一日

曉日深沉掩衣冠於東殿春風慘愴咽簫鼓於西畿
恭惟 大行太皇太后德茂塗萃功高任妙神罔恫
怨家用平康每懷勤政之憂未盡恤民之樂想安神
駕惟極哀悰

二十二日

輶車夙駕縞駟宵征悼日月之難居望山川之易遠
恭惟 大行太皇太后儉追太古誠感至神瑞滿寰
中俄列羽仙之馭澤流方外豈惟椒殿之悲瞻想光
靈益增悲涕

二十三日

秘殿垂帷尚想衣紳之侍靈輿載路莫諧羽衛之陪
恭惟 大行太皇太后知下勤勞躋民在壽懷卷耳

之深念有比屋之可封方隆正始之基遽起送終之
禮違離寢久摧殞兼深

二十四日

六綍在塗正遙北闕八神陪扈將次西陵恭惟 大
行太皇太后天覆無私坤載至靜慈容可想悲深溷
水之涯真馭莫回望極嵩峯之表尚馳哀訴莫盡孝思

二十五日

黼惟玉座奄棄東朝縞駟金車已臨西洛恭惟 大
行太皇太后作配 英祖載誕 神宗象耕烏耘將
祔蒼梧之野龍盤鳳翥永從金粟之原瞻望無窮悲
號何極

大行太皇太后靈駕至陵所未掩壙已前

皇太后日奉起居表本

二十六日

日月遄邁山川正遙緬惟車駕之行少駐寢陵之地
恭惟 大行太皇太后疇咨前代啓迪後人神器既
安遽返賓天之御幽堂未掩猶瞻儷極之輝即遠難
攀馳誠曷既

二十七日

挽紼駐行屬車解馭已就因山之制將申揜隧之儀
恭惟 大行太皇太后德配姜任仁行堯舜始被六
宮之教遠繼國風終流四表之光實增帝典尚馳誠
悃少述哀悰

二十八日

自違祖載已即壽原雖亡道路之虞第結几筵之戀
恭惟 大行太皇太后公恕統下法令合人攀號非
特於六宮哀慕實同於萬國興言摧愴豈易敷陳

二十九日

去景易流悵金車之至止違顏已遠瞻玉座以如存
恭惟 大行太皇太后治國以家視民如子時臻奠
枕方同萬國之歡礼就因山遽起九原之恨將臨引
窆第切摧心

三十日

神明所宅扈蹕固嚴倏驚晦朔之更愈結晨昏之慕
恭惟 大行太皇太后博施濟衆不廢困窮發政施
仁必先鰥寡宜饗恤民之樂遽臨復土之期緬想無

窮哀號罔極

二月一日

桃華肇節籩鮪薦新將臨引窳之期彌切對時之感
恭惟 大行太皇太后仁被草木信及豚魚動植何
知自遂勾萌之理音容永隔惟深哀疚之懷瞻望如
疑誦言曷既

二日

厚陵木拱正瞻儼極之儀慈殿雲垂尚想問安之禮
恭惟 大行太皇太后顙俊尊帝養賢及民永隆千
載之基奄棄萬方之養將臨成壙第切摧心

三日

宮陵在望月律更端屬藏事於橋山第纏哀於彤禁

恭惟 大行太皇太后體坤持載並日照臨盛治難
名方受宜民之福流陰易失遽臨襄事之期攀嚮無
從悲摧何已

四日

天序密移春陽載淑將畢送終之禮莫申報本之誠
恭惟 大行太皇太后圖治憂勤檢身恭儉疎繒天
練化已被於宮闈丹旒素帷悲莫陪於陵寢興言追
慕豈易名言

五日

諏辰協吉復土有期正纏同軌之哀愈切中闈之慕
恭惟 大行太皇太后明並日月德合乾坤朝無險
詖之私壽有憂勤之損永違大養罔極哀悰

卷之六 六日

雲逸橋陵遽就因山之制星陳羽葆將臨成壙之期
恭惟 大行太皇太后逮事 仁皇嗣音慈后增光
洪業率由舊章方措世於太寧遽興悲於先遠追攀
何及隕涕無從

七日

宮禁纏哀已極違顏之恨寢陵藏事遽當掩隧之辰
恭惟 大行太皇太后脩已安人對時育物珠襦永
闕與厚地以皆安蘭殿增悲悵昊天之恩極尚申省
問罔喻哀恫

大行太皇太后神帛回程

皇太后日奉

起居表本

八日

皇堂云揜絳闕初成屬禘事之戒期回祥車而載路
恭惟 宣仁聖烈太皇太后治登九載仁覆羣生龍
馭上賓悼厥衣之永秘玉容如在佇黼座以來寧瞻
望尚遙悲摧無喻

九日

大暮無晨莫展寢門之間青陽在候言瞻吉仗之回
恭惟 宣仁聖烈太皇太后擁佑 聖孫奉答天命
乾儀既判難名太極之功雨澤既施莫見還雲之迹
反虞將至哀牘奚殫

十日

因山云畢載主以歸欽承六翟之來已次一圻之近

十

恭惟 宣仁聖烈太皇太后以思齊之德垂無翼之
謀真馭既安永隔壽原之遠慈容可想少安秘殿之
嚴惟劇哀恫尚祈降鑒

十一日

九虞將至萬旅畢還望悠遠於漢陵瞻光華於魏闕
恭惟 宣仁聖烈太皇太后功流社稷德洽民人故
物尚存永結中闈之慕神游如在將升清廟之嚴哀
戀徘徊精爽飛越

永厚陵下宮告遷奉安 英宗皇帝并

大行太皇太后御容道場齋文

伏以聖德在天攀號罔極佛乘應物微妙難思消被
闕庭具嚴法會覬憑神貺升濟靈游謹言

大行太皇太后陵所前一日夜祭奠祝文
龜筮協從禮儀既備將以明發遷坐新宮瞻望哀號
終天罔極尚饗

大行太皇太后陵所遷奠祝文

伏以真馭在天壽原卜宅揆此吉日適于 英祖惟
哀顯相敬用告遷尚饗

永厚陵上宮開啓 大行太皇太后掩皇

堂道場齋文

伏以金粟壽原徽音永闕玉毫光相慧力長存即蒼
野之陵宮啓祇園之法會庶憑妙善少荅慈恩升濟
靈游頓起覺路謹言

太史范公文集卷第三十二

靈祐歸時贊歌

禮之刻宮宮之新園之志會無異也善以善德思長齊

所以金粟壽泉燭音小國王皇太后時慧女昇丹明營

堂進謝書文

承聖朝之宮闈恭 大行太后是

京臨昧始用吉慶出慶

所以真地五天壽皇太后新山吉日臨幸 其時斯

大行太后

大行太后是

太史范公文集卷第三十三

翰林詞草 樂語附

大行太皇太后山陵掩皇堂祭奠祝文九年二月七日

八荒同軌虔奉大事敬卜茲日將掩幽宮復上戒期

終天永慕尚饗

皇后謝賜御筵表本

妾言伏蒙 聖恩特賜御筵者 先后賓天壽原復

土八荒同軌萬旅獻功仰聖孝之感通獲神休之佑

助屬當陪扈莫展勤勞曲頒燕犒之私祇荷惠慈之

厚顧無少補深切愧懷

皇后謝 皇太后賜茶藥及傳宣撫問表

本

妾言某人至伏蒙 聖慈特賜妾茶若干藥若干及傳宣撫問者西陵先遠屬當扈駕之行長樂問安寔切違顏之戀睿懷所軫慈訓曲加仍頒茗劑之珍以慰道塗之念欽承撫諭仰戴恩私

皇后謝 皇帝傳宣撫問表本

妾言某人至伏蒙 聖恩傳宣撫問者寢陵脩祔展於勤勞道路安行屬當於陪扈荷睿懷之仁厚頒溫詔以丁寧仰戴恩私益深感惻

皇后謝 皇太后傳宣撫問表本

妾言某人至伏蒙 聖慈傳宣撫問者祇扈靈輿敢憚勤於次舍近違禁掖徒結戀於晨昏特軫慈仁曲加勞問仰荷寵綏之眷彌深感惻之情

皇后謝 皇太妃問候牋本

妾言某人至特賜問候者祇扈靈輿暫違禁閣上體聖神之仁孝居忘道路之馳驅特軫溫慈曲加勞問仰眷存之至厚懷感惻以增深

皇后謝 皇太妃送茶藥牋本

祇護行輜敢憚勤於道路暫違中禁寔結戀於晨昏上軫慈懷遠傳溫旨屬春陽之在候頒珍劑以養和戴荷所深名言罔既

大行太皇太后山陵下事掩皇堂訖於塋道陵 治地為方壇上設五方五帝神位座鎮謝墓法祝文

伏以因山制禮爰始鳩功復土告成迄終大事惟神

敷佑于役罔艱祇被精誠肅陳明薦尚祈來顧申錫
永寧尚饗

大行太皇太后山陵掩皇堂訖九虞祭祝文
第一七日

伏以光靈在天體魄降地惟哀顯相夙夜不寧虔遵
典禮祇薦禘事謹以制幣柔毛剛鬣明粢薌合薌其
嘉蔬嘉薦醴齊哀薦禘事尚饗

第二八日

伏以送形而往既襄大事迎精而返惟極孝思敬以
柔日哀薦虞事

第三九日

伏以其返如疑若有求而弗得以虞易奠惟至痛之

無窮明薦吉蠲神保是格

第四十日

伏以真馭賓天主車在道日脩虞事于以寧神瞻慕
哀恫罔有終極

第五十一日

伏以成壙而虞日接於祔翟車近止將次都畿嘉薦
普淖惟以爰侑

賜山陵使呂大防茶藥兼傳宣撫問詔

勅大防 先后在天新宮復土惟時冢相總率羣司
卹典備成還車載道服勞大事興念不忘宜有匪頒
用昭眷禮今差使臣沿路賜卿茶藥具如別錄至可
領也

賜徐王高密郡王宗晟安定郡王世準觀
察使仲先世雄仲當仲損仲覽團練使孝
騫茶藥詔勅書

勅徐王躬侍靈輜徂安吉窳哀恫罔極行役載勤宜
有匪頒用昭親睦

賜駙馬郭獻卿錢景臻王師約張敦禮曹
詩王誥韓嘉彥都大管勾張茂則防禦使
呂真刺史孟在光祿卿韓宗師衛尉卿趙
令錄少府監陳絃內侍省都知劉有方茶

藥詔勅書

勅師約肅護靈輜奄終吉窳屬陽和之紀月祗行役
以在塗宜有匪頒用昭眷渥

賜禮儀使李清臣鹵簿使胡宗愈儀仗使
李之純橋道使錢勰茶藥詔

勅清臣躬護靈游奄終吉窳眷使車之勤役陪虞輅
以言旋宜有匪頒以為慰勞

賜山陵諸司使副右司郎中承議郎以上
內殿承制崇班通直郎入內供奉官陳衍
等茶藥并傳宣撫問勅書

勅吳靖方因山修祔復土告成乃眷臣工服勞風夜
特加頒賚以示恩私今差使臣沿路賜汝臈面茶七
斤縛子茶七斤藥物一銀合合重三十兩至可領也

賜知河南府安燾茶藥詔

勅安燾因山藏事復土畢功眷密幄之舊臣守別都

之留鑰典司陵邑陪扈輜輿宜有匪頒以慰勤勩

西路祔葬皇親賜故魏王新婦譚國夫人
王氏以下茶藥并傳宣撫問詔勅書

勅故魏王新婦譚國夫人王氏躬護靈輿往安吉窀
屬陽和之紀月銜哀疚以在塗特有寵頒用昭眷禮
今差使臣泚路賜茶藥具如別錄至可領也

賜感德軍節度使同知大宗正事兼西路
祔葬敦睦宗室宗景以下茶藥詔

勅宗景以下喪期先遠祔禮告成時屬暄和眷惟勤
勩特加珍錫用示渥恩今差使臣泚路各賜卿等茶
藥具如別錄至可領也

賜西路祔葬皇親監護葬使左朝散大夫

守太常少卿盛陶以下并祔葬魏王鄧國
蔡國長公主管勾等使臣茶藥并泚路傳
宣撫問勅書

勅盛陶以下肅駕使輜躬臨原兆涉塗良苦庀事尤
勤宜推勞賜之恩用示眷存之意今差使臣泚路賜
汝臚面茶五斤縛子茶五斤藥物一銀合合重二十
兩內祔葬鄧國蔡國長公主允弼新婦等管勾列端
張禹備寶鐸脩墳宋良臣諸司張祐各賜臚面茶二
斤縛子茶二斤藥物一銀合合重一十兩泚路香火
張師逸李綬并祔葬故魏王泚路香火績壽各賜臚
面茶一斤縛子茶一斤藥物一銀合合重五兩至可
領也

賜西路祔葬皇親敦睦宗室感德軍節度使同判大宗正事宗景以下并監護葬使左朝散大夫太常少卿盛陶以下茶藥口宜有勅汝卿等爰協吉期克襄大事陽和在候夙夜良勤宜有匪頒以為慰勞今差入內侍省內西頭供奉官劉友端賜汝卿等茶藥兼傳宣撫問想宜知悉

虞主回京雙調四曲

導引一曲

思齊 文母盛烈對皇天演寶祚千年卿雲復旦治功全厭人世登仙龍輿忽掩三川綵仗屬車旋維清衆舞告英宣入詩頌歌絃

六州一曲

太平功擁佑 帝堯聰歌九德愜五戎寰海被祥風車書萬里文軌同自南北西東耕田鑿井戲垂髫華髮躋仁壽域變時雍大明方天中棄養東朝苦怱怱玉座如存永隔慈容恨難窮崇慶空飈輪仙馭無蹤超宇宙駕雲龍禘翟掩軒宮栢域王氣長鬱葱温路照寒崧光靈在上徽音流千古昭如日月麗層穹太任家邦隆彤史青編永垂鴻清廟笙鏞奏假欽崇

十二時一曲

轉招搖 厚陵迴望雙闕起岌堯曉日麗譙金爵上千霄風雨闕夜宮閉不重朝奉鸞鑣漸遙玉京知何處飛英銜恤亂絮纏悲春路迢迢縹緲哀音發龍笳鳳簫光景同慘澹度巖邑指河橋馬蕭蕭絡繹星軺

拂天容衛江海，上寒潮萬國。魂銷追昔御，東朝開鈿扇。垂珠箔，侍瑤韶，寶香燒散飄。手開仁壽域，神孫高拱崑崙，渤澥玉燭方調。一旦宮車晚，旋歸沈寥。九載初如夢，次功得瓊瑤。

虞神歌一曲

駕玉龍，設初虞祭，終前旌舉。天回洛水路，轉崧峯，瞻寥廓。煙霏沖融，宵無蹤，震地鼓吹悲雄。誰何羽衛重，拂雲旗幟，眩青紅。來漸東，清塵灑道脩。職百神，恭回首蒼茫，霧雨吹風，掩泉宮。

寰畿入山川，改容鼓鍾臨。近次千官望，拜涕淚衡從。人如堵，晨光葱朧闕穹隆。馳道禁永相通，當年遊幸空。皇儀事畢，泣重瞳。哀未窮，巍巍餘烈，輝映簡編中。

億萬斯年覆載同功

虞主祔廟日中呂導引一曲

延和幄座臨御，九年中往事已成空。皇基固覆，孟四海本自太任功。九虞初畢，下西宮。廟祔與天崇。周家盛卜年卜世，萬祀永無窮。

撫問廊廡路臣寮口宣

卿等夙以材能，並膺選寄。外勤邊要，久效官成。式厚眷存，俾加勞問。今差入內，侍省內東頭供奉官陳嘉言傳宣撫問，想宜知悉。

賜新除竇文閣直學士知成都府韓宗道

辭免不允詔

朕惟全蜀之寄，寔難其人。卿以才猷，歷位省府，矧乃

祖叔父世守西南卿在先朝亦嘗奉使于茲三世
出牧一方必能宣布中和惠綏遠俗則朕無西顧之
慮豈不休哉褒加寵名厥惟常典其趣祇命無或固
辭所請宜不允

賜資政殿學士守吏部尚書胡宗愈辭免
兼侍讀不允詔

朕邇英訪道十年于茲方當博延儒臣總覽載籍卿
純誠懿學直諒有餘進讀于前渴聞嘉論勉膺新命
無或重辭所請宜不允

徐王改封冀王制

周尊公旦倚為回輔之師漢重王蒼位處三公之上
及我仁祖加禮荆王顧惟冲人敢後叔父誕敷明

卿親賢莫二屏翰所尊進秩帝師改封王國其承寵
典以副眷懷今賜卿告想宜知悉

賜冀王三上劄子奏辭免不允詔

卿秉德謙冲神明所相為善最樂宜得仁者之壽損
疾有喜當聞勿藥之廖褒崇懿親茲率舊典朕命不
易其可以辭所請宜不允

賜安武軍節度使河東經略安撫使謙知
太原府韓縝再上表并劄子奏陳乞致仕
不允詔

卿出入將相勤勞四朝古之大夫有不得謝况於
股肱之舊方膺蕃屏之寄志氣克壯卧護有餘宜深
體於眷懷其無拘於禮制所請宜不允

賜永興鳳翔等軍官吏等示諭勅書
勅永興軍官吏軍人僧道百姓等朕以顥地親叔父
位冠宗盟追惟 文母之深慈乃眷賢王之令德方
畢升祔宜先寵褒進秩維師增榮舊鎮大啓冀土永
為宋藩想聞渙號之頒益洽周邦之喜今特授顥守
太師依前開府儀同三司雍州牧鳳翔牧賜詔書不
名充永興鳳翔等軍節度管内觀察處置等使改封
冀王加食邑七百戶食寔封三百戶勲如故故茲示
諭想宜知悉將士等各得平安好參佐官吏僧道耆
壽百姓等並存問之遺書指不多及

冀王顥布政榜

應永興軍管内官吏軍人僧道百姓等茲者奉膺制

命播告治廷皇叔永興鳳翔等軍節度管内觀察處
置等使守太尉開府儀同三司雍州牧兼鳳翔牧上
柱國徐王食邑一方四千五百戶食實封四千九百
戶賜詔書不名顥稟訓 英皇同氣 神考仁義根
于天性孝友冠于人倫昔在 先朝蚤膺異數迨
宣后九年之政無憂子一毫之私追惟崇慶之功罔
極昊天之感方畢太宮之祔饗莫先尊屬之褒嘉是
用登拜帥垣仍聯使節徹彼徐上受茲冀方內獎皇
家外綏侯服進陪多賦衍食真封於戲並建親賢寔
為社稷之衛益強藩屏用承 祖考之休往膺典冊
之光永介壽祺之祉式昭令德無愧前人可特授守
太師依前開府儀同三司雍州牧兼鳳翔牧賜詔書

不名充永興鳳翔等軍節度管内官觀察處置等使
改封冀王加食邑實封

賜新除守太師冀王劄子奏辭免不允詔
勅冀王省所劄子奏辭免恩命事具悉朕未懷先
后圖報無窮地近屬尊莫如叔父宜有異數以先列
藩遽攬奏封力形謙避雖深嘉歎難徇懇誠所請宜
不允

賜冀王再上劄子辭免不允詔

朕以上公錫命無若帝師之尊北土啓封莫如冀國
之大非予叔父孰冠宗藩其勉欽承勿庸遜避所請
宜不允

閣門賜冀王告口宣

命進位公師無改旌麾更分茅社奄受冀土作蕃皇
家顧有列於內朝莫獲臨於賜履惟茲多政厥有故
常爰咨文武之良深體聖神之寄務農重本先教後
刑寔倉廩以振貧窮修戎兵以遏寇虐庶成仁壽之
俗上寬宵旰之憂將校在和緇黃式化道雖云遠心
不謂遐諸有尊親亦附存問

改元御札

朕荷皇穹之眷命守列聖之丕基十年于茲四海用
乂日聽外朝之治躬勤萬物之微眇若涉淵未知所
濟顧念祗承上帝誕保受民惟駿惠於先猷以續隆
於下武乃稽仁祖之成憲恩大文考之烈光其
因盛夏之辰載新元統之號庶導迎於景貺用敷錫

於羣黎宜改元祐九年為紹聖元年布告多方咸體
朕意故茲札示想宜知悉

坤成節教坊致詔八年

臣聞後天申祝已稱內殿之觴湛露示懋爰有外朝
之燕使幣致北鄰之聘星躔開南極之祥會芾充庭
慶千載闕希之遇舞童成佾奉一時交際之歡恭惟
皇帝陛下膺受正符統臨神器昭哉嗣服承 六聖
之鴻休大矣孝熙盡 三宮之至養恭惟 太皇太
后陛下執思齊之道御假樂之時用楫濟川始仰成
於傳說斷鼈立極俄追配於媯皇天地得以清寧草
木遂其零茂食既克於四輔歌亦備於九功肆及誕
辰具陳樂闋童冠紫袴稍依慶善之文容寶鑑露囊

盡斥開元之侈事臣猥居法部叨隸奉常冒瀆天聰
敢獻口號

口號

綵仗含風縹緲間神孫當宇燕千官太陰入夢祥初
發中岳聞呼老更難諸夏豐年生詔令兩儀和氣入
吹彈下臣拜獻坤成樂長奉千秋萬歲歡

勾合曲

賓筵初秩觴行露酌之醇樂節克諧技奏鈞天之妙
雲龍在望魚藻恃時上奉宸歡教坊合曲

勾小兒隊

御香成蓋宮漏穿花霓裳羽衣方聽妙音之舉瑤環
瑜珥忽逢稚子之遊申以宮商教坊小兒入隊

隊名

浴沂童子詠獻壽老人星

問小兒

悻帶並趨抗霓旌而布武鬣鬣相顧應盡鼓以分行
宜露悃誠雍容敷奏

小兒致語

臣聞南北通觀必有豆觴之盛君臣飾喜亦資磬管
之和矧千秋載誕之期當萬寶惟成之始所以命太
師而奏雅延百辟以醞醇恭惟 皇帝陛下至道生
知英能天縱日御金華而講藝間臨壁水以恢儒奠
玉郊丘獲神祇之昭荅薦祧寢廟蒙 祖考之歆安
遊幸闕然會朝勤止辰不動而星拱天何言而物生

遂追到誦之隆皆自姜任之訓乃修故事以樂嘉時
臣等猥以弱齡值茲華旦躬緣薄技旅進廣除未敢
自專伏候進止

勾雜劇

慶均天壤可無燕衍之私樂備古今斯有俳優之戲
仰祈天笑雜劇來歟

放小兒隊

音容秀整被服鮮華干羽初陳來謁舜階之下風雲
既闕却歸沛邑之中再拜天墀相將好去

勾女童隊

寶階三道取化國於逡巡力士五丁獻仙山於咫尺
中有駉鸞之侶來呈舞鳳之工鐘律方諧兩軍女童

入隊

隊名

九重開舞地一氣結歌雲

問女童

翩若鸞鸞來自風塵之表璀璨珠玉隨生馨咳之間
詞令必多雍容敷奏

女童致語

妾聞昔歲誕彌浴致九龍之端茲辰飲御舞騰百馬
之豪蓋以下伸臣子歸報之心上奉 祖宗舉行之
事藹頌聲而並作鬱協氣以橫流恭惟 皇帝陛下
育德淵微收功敏妙殆致邦刑之措數膺年穀之穰
露効甘滋近在禁嚴之地蠶呈異翼自成組織之文

至於三韓獻金匱之書五嶺貢炎測之布貺符既至
氛沴自銷比置酒於未央寔廣恩於長信安等家居
京甸籍占梨園聞雅奏之發揚謹成班列瞻睟容之
懌穆願奉歡愉未敢自專伏候進止

勾雜劇

仰瞻魏闕橫佳氣之鬱葱申命優臣示湛恩之汪濊
少停舞袂雜劇來歟

放女童隊

綴行變婉步節虛徐璧月瓊枝暫相輝於宮闕朝雲
暮雨盍各返於山川再拜天階相將好去

太史公文集卷第三十四

暮雨盈谷

...

...

...

...

...

太史公文集卷第三十四

啓狀

田知沼州張朝奉賀啓

右某近奉命書進升左史寵靈非次惕厲靡容力抗
 封章願收綸綽方旁求於俊彥宜不假於器名祿勝
 己則近貧聲過情而有耻荷聖神之迴聽察孤賤之
 由衷乾坤之仁曲垂於從欲日月之照下逮於容光
 獲寢過恩還祗舊職豈謂伏蒙知郡朝奉至誠樂善
 厚義敦風初傳命於置郵遽占書於記室遠詒慶問
 仰服勞謙拜貺尤深銘藏無斁下情不任感荷之至
 田陳西都運葉待制謝啓

伏審光奉命書近升法從付兵民之大計摠關陝之

與區慶典惟行僉言允協恭惟某官天資強敏行表
方嚴以才猷結主知以儒雅飭吏事優游餘刃揮發
壯圖朝廷倚之以豐財士論期之於亮采仲山將命
曾無吐茹之私孟博登車漫有澄清之志暫擁旄於
方面俄易節於外臺吏自不欺服劉晏精明之智軍
無絕餉推蕭何轉漕之功上寬顧憂時所資仰未皇
修慶遽辱貽書贍令德以惟勤奉謙光而載揚其於
感頌曷罄敷宣

回喬學士謝啓

伏審祇膺宸綍進直書林仗惟慶慰竊以人文化成
莫先於典籍古訓是式實賴於賢才恭惟 祖宗以
來尤重館閣之設詳延天下方聞之士討論上世帝

王之書所以昭雲漢之文章盛乾坤之德業凡居是
職即踐清途自非卓有異能曷稱妙選恭以侍講學
士瑚璉妙器杞梓天材漸游夏之淵源兼卿雲之華
藻景行推於鄉黨清名聳於縉紳領袖一時著龜後
學宗藩朱邨久賴於敷經芝閣蓬山復留於校籍大
任茲始輿論所歸側聞褒升尤切拊蹈未馳慶牘先
枉謝緘載研溫藻之文益仰謙冲之德誦言無斃永
光篋笥之藏佩服殊深更甚瓊瑰之賜制拘出謁禮
阻造門謹奉啟陳賀兼謝

回孫舍人謝啓

伏審光膺宸綍進直掖垣伏惟慶慰竊以內史之贊
宰司邇臣之與國論茲任尤重得人為難詔見王者

之心詞鼓天下之動賞罰號令之所自出典謨訓誥於是乎成發諸朝廷沛若江河之決書之方冊炳若日星之垂自非傑異之才曷稱光華之選恭以中書舍人行成防表學造淵源蚤以方聞入奉大對忠言切於利行直節見於當官出處歸潔其身夷險不易其操迨夫訪落倚以繩愆霜簡所加朝紳自肅諫垣體議深沃清衷蜀宇宣風久勞外使繇螭塗之近列陟綸閣之清班斧藻訓詞方發揮於賢業謀謨王體寔參贊於鴻猷公論所歸柄任茲始歛聞成命竊慶登賢未遑刻牘之儀先辱貽書之貺感誦無數敷述奚殫

回顏舍人謝啟

伏審祇膺帝制進直綸闈伏惟慶慰竊以內史之贊宰司邇臣之與國論茲任尤重得人為難詔見王者之心辭鼓天下之動賞罰號令之所自出典謨訓誥於是乎成發諸朝廷沛若江河之決書之方冊炳若日星之垂自非潤色之才曷副光華之選恭惟中書舍人行為坊表學造淵源蚤繇直道之行進被先朝之遇宣風使部有仲山之將明分職郎曹見公孫之潤飾論經王府載筆規廷益隆當宁之知顯奉試言之召越從左史序進西垣矧令養賢而及萬民籲俊以尊上帝欲圖庶政之又實賴近侍之良惟出入起居罔不欽故左右前後無非正交修后德時亮天功延登哲人協慰公論益觀遠業光輔鴻猷某久以

庸虛幸同陪侍欽聞成命竊忤私懷辱貺長言過形
謙德感頌激切不任下情

回館職謝啓

伏審祇奉宸綍進直書林伏惟慶慰竊以人文化成
莫先於典籍古訓是式寔賴於賢才恭惟祖宗以
來尤重館閣之設詳言天下方聞之士討論上世帝
王之書所以昭雲漢之文章盛乾坤之德業歷觀前
哲皆踐此塗自非問望之隆曷副高華之選恭惟學
士幾深蘊識德性存誠由孔孟之門牆入淵濶之壺
奧居今之世與古為徒宜進登於天朝久退避於公
府上庠講道師表儒紳庶子治官典司宗籍逮茲德
舉允協僉諧東觀校讐尚有留賢之歎西清顧問行

膺側席之求欽聞褒升尤切喜忤特紆傾蓋重辱貺
書仰謙眷之過隆拜嘉貽而已厚制拘出謁禮阻造
門感悚之深不任下懇

回孔舍人謝啓

伏審祇膺帝制進直綸闈伏惟慶慰竊以內史之贊
宰司邇臣之與國論茲任尤重得人為難詔見王者
之心辭鼓天下之動賞罰號令之所自出典謨訓誥
於是乎成發諸朝廷沛若江河之決書之方冊粲若
日星之垂自非潤色之才曷副光華之選恭惟中書
舍人系承聖裔學號儒宗寔有力於斯文屢先鳴於
多士令德中積英聲四馳冊府著書虞庠教胄經惟
勸講罔非堯舜之談詞掖代言式是商周之體越從

左史序進西垣矧令養賢而及萬民籲俊以尊上帝
欲圖庶政之又實賴近臣之良惟出入起居罔不欽
故左右前後無非正交修后德時亮天功延登哲人
協慰公論益光遠業久輔鴻猷某久以庸虛幸聯陪
侍忝預交游之末獲聞風義之詳昔參賜第之榮今
遂同朝之願欽聆成命竊忤私懷辱貶長言過形謙
德感頌激切不任下情

回陳舍人謝啓

伏審祇膺帝制進直綸闈伏惟慶慰竊以內史之贊
宰司邇臣之與國論茲任尤重得人為難詔見王者
之心辭鼓天下之動賞罰號令之所自出典謨訓誥
於是乎成發諸朝廷沛若江河之決書之方冊粲若

日星之垂自非潤色之才曷副光華之選恭惟中書
舍人才通倫類學造淵源懿文為吾道之表儀高行
乃諸儒之準的先鳴多士獨擅英聲布武青雲久淹
高步初慶郎曹而分職旋聞柱史以記言侍咫尺之
天威雖膺妙選出絲綸之帝制乃副僉言矧令養賢
而及萬民籲俊以尊上帝欲圖庶政之又實賴近侍
之良惟出入起居罔不欽故左右前後無非正交修
后德時亮天功延登哲人協慰公論益觀遠業光輔
鴻猷某久以庸虛幸聯陪侍忝預交游之末獲聞風
義之詳昔參賜第之榮今遂同朝之願欽聆成命竊
忤私懷辱賜長言過形謙德感頌激切不任下情

回知郡周承議賀啓

此者叨奉命書進升講席固辭弗獲居寵惟憂伏念
某學古迂踈受才謏薄誤參華於法從遽召直於禁
林祇率舊章懇祈散秩初謂一麾而出守終膺三接
之延登執帙經帷特復久虛之職紬書史觀俾成傳
信之文顧省衰疲詎勝眷委此蓋某官至誠樂善厚
義敦風過有獎成迺容冒處曲垂慶問益仰謙勤感
誦所深喻言奚悉

回賀翰林學士狀

此者祇奉綸言進陞禁直久玷露門之講復塵浴殿
之班蓋獎飾之有加致寵光之誤及特紆慶問深切
感悰

謝訪及狀

伏蒙尊慈特垂寵訪拙疾為梗造謁未遑感悚之深
不任下懇

回知全州王左藏賀冬啓

永州

伏以書雲紀瑞測日迎長是為建子之正宜享自天
之祐伏惟某官膺時納慶與國均休阻修賓謁之儀
特辱音書之貺感頌之切敷述奚宣

回知道州秦承議賀冬啓

上同伏惟某官懿文博古厚德庇民聊敷政於方州
竚告猷於宸扆逢時之吉受祉無疆

下同前

回縣令以下賀冬狀

亞歲令辰特煩慶問感佩之至但切下情

回鄰州通判啓

賓州

謫居湘浦已仰高風遠徙邊州復鄰治境伏窮閭而
念咎通記室以不遑豈意謙光復垂書問載披華藻
如佩芬蘭伏惟通判宣德世濟忠嘉天資明哲孝友
施政愷悌宜民出貳名藩久洽聞於輿頌入朝宸宸
行峻被於寵章厚義所臨瞻言尤切永惟銘感昌馨
叙陳

納采啓

夙仰慶閭願修嘉好某第二子温朴愚粗立日訓義
方賢女令淑有聞尚勤姆教已協宜家之卜敢先納
采之儀欣幸所深喻言奚悉

代資政公回司馬諫議言定狀

某啓積善之家有慶正卿之世其昌特紉用鴈之儀

奚取食鮐之美第五十三姪孫女未閑姆教尚在冲
年令姪承務蚤服義方已親外傳遽示問名之禮俾
修合姓之歡嘉命所臨固辭弗獲愧無以喻言不能宣

代富公回豫章郡王狀

伏念退老田廬久違朝闕沐雲天之澤幸偃息於泰
和仰邦族之仁徒詠歌於信厚惟筋骸之難勉致牋
問之靡通逖想光儀坐馳勞素屬園陵之展事承騶
馭之在塗緬惟跋履之勤倍協保綏之妙恭以大王
慶源鍾粹景行推高懷德惟寧用強於周道為善最
樂有美乎漢風分寶玉以隆恩錫脈膳而異禮表儀
藩后屏翰天朝寔資夾輔之賢永底變雍之盛敢圖
謙眷俯逮衰殘特垂貺於緘滕頓生輝於蔀室其於

銘荷曷罄敷宣

代王宣徽北京謝兩府啓

此者祇膺中詔再鎮北門撫全魏之封畿總元戎之
節制偃藩之始思職為憂伏念某官闕雖深事功匪
立視秩二府久塵徽省之班歷守三都屢掌帝宮之
籥間祈安逸越去近嚴爰領使於殊庭幸息勞於私
館屬合宮之藏事祇召節以陪祠肆覲威顏具瞻衡
弼俄奉中天之命復叨朔部之行言念哀遲豈勝寄
委此蓋某官斟酌元化登翼大猷率同羣后之心光
輔一人之治顧惟舊物嘗預僉諧特於戶牖之間曲
加甄藻之賜致茲禱散被乃帝俞敢不寅亮敦誠勤
勞宣力庶禔毫髮仰荅坏陶

代司馬公回趙龍圖啓

伏審祇膺宸渥榮總藩條還內閣之禁嚴委中軍之
節制淵衷所簡僉議允諧恭以經畧龍圖敏智為資
公忠秉節出逢亨會自結眷知領使外臺遠邇想聞
其風績臨戎極塞朝廷倚賴其籌謀屬王旅之徂征
驅傳車而西邁勤勞夙夜經畫始終惟隴右之故區
乃關中之外屏往宣廟略必得珍才果膺推轂之行
復峻登壇之拜析衝禦侮從容樽俎之間柔遠安邊
弭息烽燧之警欽聞成命方切欣悰猶稽慶問之儀
遽辱華牋之貺興言感忤曷罄敷陳

與集賢相公啓 以下代文潞公

伏自一別光儀十踰稔歲仰榮煌之星座久曠音書

荷垞北之化鈞屢分符竹屬因山而歲事承整駕以
在塗載惟跋履之勤懋協保綏之勝恭以某官中和
秉德密勿告猷發揮經濟之文登翊昌明之運天功
時亮帝載惟熙
品物無不茂遂自宮
闈之過密及龜筮之告期特輟宰司遠護仙駕萬方
同軌共嚴 聖后之喪三事登車實搃橋山之禮禁
留司管籥祇奉陵園夙夜惟勤雖殫於拙力期會所
迫實懼於闕供仰繫庇賴之私獲免曠瘞之咎將候
迎於公哀增系望於心局更冀上為廟朝精調寢餼
云云

岐王 嘉王先狀

伏以 聖后賓天因山制禮賢王扈蹕整駕在塗仰

惟跋履之勞仍盡哀摧之感神明所佑寢餼惟和某
居守邠畿祇事陵邑阻伸慰覲第切瞻馳

曹侍中先狀

伏以 聖后賓天橋山卜壤時倚戚藩之重遠陪仙
蹕之儀恭惟夙駕之勤仍盡哀號之感即諧展慰預
切馳誠

山陵集賢相公

伏以 聖后賓天橋山卜壤特委宰司之重遠陪仙
馭之儀跋履封圻勤勞夙夜神明佑助寢餼康和仰
惟哀慕之餘無爽節宣之勝即諧參覲預切瞻依
禮儀使以下先狀

伏以 聖后賓天橋山卜壤特委侍臣之重遠陪仙

馭之儀即遂披承預深瞻跂

回隨 靈駕皇親先狀

伏審肅駕行軒遠獲仙蹕俯臨近甸特枉絨騰感佩之私不任下悃

謝兩府啓

此者祇奉渙恩俾司洛宅解北門之管鑰畫西土之封畿荷寵惟優偃藩茲伏伏念某久塵上衮素乏異能出入三朝勤跨四紀自避繁於樞府旋改鎮於魏都再奉命書七更歲籥引年甚懇陳力無堪累叩天閣未迴宸聽屬合宮之歲事趨召節以陪祠肆觀威顏具瞻衡弼期盡還於印紱獲歸老於田廬不圖寵進上公禮優羣后莫容謝事猶委分符任隆周召

之魚庸榮極甫申之褒賞帝宮居守私室就安此蓋其宜於冀大猷斟酌元化勤收舊物廣厚羣倫秉國論以僉諧贊上心之簡在致茲衰朽叩被恩榮惟修屏翰之勤庶答陶鎔之賜感銘至切敷叙奚殫

謝章參政啟

近奉詔書特賜詩序眷恩隆厚麗藻鋪宣君都臣俞戴若太山之重聖作明述寵踰華袞之褒參政大中蘊嘉謀猷有大手筆親膺睿旨渙發英辭臯陶颺言乃贊襄於舜帝吉甫作誦寔歸美於宣王載觀叙事之工益慶逢辰之極刊之琬琰永為不朽之光飾以青黃俯愧無庸之質感佩之切不任下情

與兩制別啓

某近膺召節入侍祠宮宸眷曲加便蕃渥澤逢辰之
幸衰朽極榮伏蒙軒車訪臨垂慰欽企奉別如昨瞻
懷寔勞欲丐雅章以寵行色少煩藻思永為蔀室之
光也附荅布懇幸惟悉察不宣

謝兩制寄詩別啓

伏蒙英私垂貺佳什寵賁衰質發揮榮遇言贈之美
穆如清風誦詠于再感服無數當令琰刻永為家寶
奉啓述謝一二不宣

荅蔡參政別啓

伏蒙寵示先公太師誌文發揮潛德薦慰幽壤論撰
之筆九于無窮積善餘慶信為不誣顯親揚名何以
尚此眷私之厚雅故不遺循覽再三感服無數叙謝

之懇言不能宣

謝史館王相公別啓

昨蒙 聖恩賜詩寵行繼以上宰賡歌盛作二府諸
公併紉雅製固已焜耀為榮無窮今復蒙送示兩制
館閣羣賢之詩文采相輝增諸琰刻遂使私室上有
聖神雲漢之章次有舉朝公卿大夫清風之誦求之
近古蓋所未聞此豈獨衰朽之光亦足以見邦國風
化之厚也苟非上恩隆異深眷優禮同德協贊上承
下率為之寵數殊於等倫何以致茲盛事乎幸甚幸
甚奉啓叙謝言不能宣

謝執政啓

向緣謝事入覲威顏特辱撫謙俯臨僻陋玉津賜宴

瓊林寵行同醉堯觴共飽周德聖作物觀兩承天漢
之章君都臣俞疊委宗工之製卿雲比爛華袞垂褒
臯陶賡歌蓋奉惟幾之命吉甫作誦皆貽孔碩之詩
焜耀歸塗輝光蔀室永惟榮幸實罕比倫仰宸眷之
曲私見邦風之篤厚言旋里開方遠台閔感戀增深
銘藏至切

與兩府賀冬狀

伏以書雲紀瑞測日迎長捷萬物之幽萌亞三朝之
元會恭惟某官氣鍾英粹道契亨嘉師尹庶工式協
具瞻之望燮和元化宣膺助順之祥阻伸慶謁之儀
徒切以依之懇

曹郡王

某官慶承勲閎望重威藩兼馬鄧之寵榮大許申之
土之陽介祉並國延休歡頌所叢名言罔既

元資政

某官懿文華國令望端朝夙推職袞之功日奉經帷
之對升陽屆序視履延祥慶頌所深名言罔既

賀樞密孫知院啓

伏審奉膺庭誥進長天樞伏惟慶慰恭以某官沉正
秉彛惠和迪哲登于廊廟益隆當宁之知委以鈞衡
遂冠本兵之任阻修慶謁第切歡悰

賀樞密呂正議啓

伏審祇膺明誥進位中樞伏惟慶慰恭以某官問望
端朝誠明體國經綸之學已參翊於洪機啓沃之忠

更倚毗於近輔欽聞嘉命深切歡悰

賀樞密韓太中啓

伏審祇奉命書進登樞府伏惟慶慰恭以某官時推問望世濟忠純簡在上心久贊襄於機政擢居近輔爰登翊於聖謀聞命以還歡言豈叙

賀都承旨張客省啓

伏審祇奉制恩摠承樞筦伏惟慶慰恭以某官通才成務敏識造微密勿帝猷久司於宣納彌論機政進貳於疑丞欣忭所深名言豈叙

回熙州苗團練謝啓

伏審心膺溫綍就領价藩撫隴右之故封分闡外之隆寄折衝禦侮久欽名將之風柔遠安邊遂摠中軍

之政威懷殊俗宣布上仁承協嘉時已臨盛府遽貽芳訊備識冲規感佩所深喻言奚既

賀北京王太尉啓

伏審光膺綸綍寵建旌旄進登上將之壇再領留都之鑰帝心妙簡輿論均歡恭以留守太尉夙冠時英遍參法從奧學本乎經濟賢業發於盛明出入三朝蕃宣四國撫封畿於全魏壯屏翰於神都樽俎折衝方倚老成之碩畫詩書謀帥乃揚休命於外庭懋典傳聞欣悰交切阻修慶謁倍積瞻馳

回謝北京王太尉啓

近者伏審留守太尉顯奉命書榮分將鉞敢圖謙眷首陸緘滕國朝草五季之弊風重三軍之節制元

戎之寄必屬名儒舊德之求乃登上將矧踐揚之滋
久惟問望之素隆僉謀所諧寵拜宜渥鎮魏都之巨
屏護朔野之列城幕府初開藩閫增重遽煩記室遠
示書筠感忤交深喻言奚既

賀王太尉啓

伏審光膺帝制進陟將壇榮擁節旄再司官鑰伏惟
慶慰恭以留守太尉英名高世碩望端朝遍參法從
之華升翊大猷之美清衷妙簡僉議攸歸全魏撫封
方倚安邊之略中軍制閫爰加授鉞之崇開府云初
偃藩增重欽聞誕告寔切歡悰阻伸望履之儀第極
瞻風之素

回熙州趙龍圖啓

比審祇膺宸渥榮總藩條伏惟慶慰經略龍圖夙以
才升自結主眷外臺領使風采著聞極塞臨戎方略
屢上復峻齋壇之拜還登內閣之華竝觀遠猷益對
來寵方開幕府首墜書筠感忤所深喻言奚既

賀韓樞密知院啓

伏審奉膺庭誥正位天樞伏惟慶慰恭以某官世濟
純忠時歸碩望延登廊廟益隆當宁之知進秉鈞衡
遂冠本兵之任壯邦家之柱石宣帷幄之籌謀翊贊
聖明鎮服中外阻修慶謁第切歡悰

賀安副樞啓

伏審祇膺帝制進位天樞伏惟慶慰恭以某官沉正
秉彛惠和迪哲訐謨足以經遠厚德足以鎮浮法從

參華宣忠勞於外地官領計隆問望於弼諧允當
夢卜之求升贊璿璣之政淵衷妙簡輿論僉諧阻伸
慶謁之儀第切瞻依之至

賀留守韓相公啓

伏審光膺帝制榮鎮洛師伏惟慶慰恭以某官厚德
明謨純誠亮節再登上宰協贊太平領使殊庭聳具
瞻於四海陪祠泰時祇顯相於一人寵建節旄出司
宮鑰眷求元輔分正成周先十乘以啓行冠諸侯而
述職某乞身得謝交政預榮將覲高風倍欣勞素

謝兩府狀

祇奉命書獲解宮鑰恩容就第寵冠在庭雖辭兼鎮
之隆尚忝維師之拜措紳聳歎閭里光榮竊念某被

遇 三朝服勞累紀迭居二府歷拜五公駢珪組以
褒崇慙曷藝之勲伐自縱心而請老無虛歲以告歸
荷異禮之眷留示至仁之厚賜詔盈几軺軒接途
以及耄期始諧夙志天惟從欲俯矜一物之誠相亦
有終遂繼前人之美極臣鄰之榮遇實今古之罕倫
此蓋某官登翼皇猷布昭元化人惟求舊義不忘勞
紆廊廟之矢謨贊聖神之軫慮閱其衰篤許遂佚休
猥以華顛膺茲殊渥方棲僻陋退屏塵紛荷德至深
誦言奚既

謝外任前兩府啓

某官左右 王家緝熙帝載夙贊鈞衡之化嘗紆廊廟
之言致此 衰遲獲遂休佚復膺殊渥不廢舊勞感幸

所深喻言奚既

兩制

某官勵翼帝猷參華法從允諧僉論交贊清衷

以下同

曹郡王

某官望重藩垣地兼勳戚贊襄上德柔惠邦風

以下同

北京王太尉

某官望重本朝任隆羣后敦風茲久樂善有初

以下同

回謝孫觀文啓

祇奉制函俯從懇請恩答就第寵冠在庭伏念某被

遇三朝服勞累紀久塵上衮無補鴻猷早聞知止

之風備竭告歸之懇上仁篤厚眷禮縻留已寢迫於

耄期始聽還於官政惟寵光之絕異非涯分之可安

此蓋某官左右王家緝熙帝載夙冠鈞衡之任嘗紆

廊廟之言致此衰遲獲全終始方力辭於天寵將退

託於里居幸謝塵紛即安休佚鄰封密邇慶問先臨

仰懷求舊之私益見敦風之美永惟感佩曷罄敷宣

太史范公文集卷第三十四

太史范公文集卷第三十五

賦論策問

賦

夤畏以饗福賦

祇畏天道能饗隆福

御試

天道昭顯聖心肅祇欲興隆而饗福乃夤畏以承時
 深慎清衷以上當於帝眷誕膺純祉能永固於邦基
 若夫究精禋之所由勤夙宵而當畏何脩而臻治道
 何飾而致休氣惟天為大每懷懼而敢寧惟聖為能
 宜擁祥而不既欽若元后簡于上天日月星辰有順
 而有盪風雨寒暑或應而或愆是必建大中而茂對
 圖至治以周旋動以至誠仰德威而自懼介之純嘏
 享宗社以長延則知萬幾非逸豫而為四海在憂勤

而保宜軫慮於當極以延禧於有昊惕焉若厲惟應以寔而不以文善則降祥蓋親有德而饗有道豈不以助順者惟天之理降福者乃人之能無其畏則心或怠有其畏則德乃興五事交脩惴如臨於淵谷萬靈來助固若保於岡陵噫位豈不尊志非自廣災常懼於未至福乃來於無象所以文王小心而事帝多祉常懷高宗見異以飭身百年長饗若然則寶命增永蘿圖浸隆謹天成以當國延帝休而在躬用能薦享郊邱荅純禧之所自濟民壽域傳徽號於無窮大哉建功所以永年宜人所以受祿應如律呂之動報逾影響之速夫知天之仁愛人君夤畏者饗其福

天子龍袞賦

天子龍袞文以為貴

錫慶院試

德至尊者其服稱禮甚盛者唯君全作龍袞以昭物表聖人之御天繪以文章既盡飾身之美其變化斯為取象之先稽若禮經富哉天子內之尊也必有以副其外表之著也蓋有以彰其裏乃衣龍章以昭德美始惟制法考古象而遠觀終乃脩容飭帝躬而光被若夫祭以嚴脩服而示恭采交華於五色衣炳象於羣龍助國體之輝赫壯天威之肅雍有降有升固異三公之服或飛或躍蓋尊萬乘之容觀其驥首君躬存身帝袞若翔雲之初矯如在天而益遠珮玉焉以節其行步冕旒焉以增其赫烜絢采章之十二其制昭昭賁儀禮之三千厥容宛宛豈不以至廣大者函夏極崇高者聖君不尊不顯何以一於衆不美

不飾何以大其勲是必以多為貴有放而文下視華
蟲豈攀鱗之可及旁開繡黼疑奮翼以相分上不可
以降而卑下不可以僭而擬四靈之瑞唯王者之應
六衣之用唯人君而已宜乎尊袞冕以陳之按禮圖
而得以是故舜帝明而作服制所由興周人取以登
山文為之始則知大而化者聖之謂化而神者龍之
為服之身而益顯稱其德以攸宜彼交以為旂間日
星而並麗章而作韍配山火以猶卑又曷若服以昭
明文惟經緯矯如奔翥之狀蔚若騰陵之氣故曰衣
者身之章其斯以知天子之貴

論

成敗之幾在察言論

御試

天下之事已成而後知其是已敗而後知其非此衆
人之智也聖人觀成敗於未然之前而知成敗於已
然之後不慮之於行事之始而慮之於聽言之時以
為凡事之機出於此也天下非一日而成亦非一日
而敗也故古人有一言可以興邦而亦可以廢者雖
其言必如是然而興廢之所由也今夫有以仁義
之言說於人主而人主知其所謂仁義而行之則凡
事莫不成於仁義然而仁義必久而效不可一日而
成也知其不可一日而成而遂不行則天下之事亦
不成也惟能久而行至於成則是由於察言之善也
今夫有以佞邪之言說於人主而人主不察於佞邪
之言而從之則凡事莫不敗於佞邪然而佞邪必久

而效亦非一日而敗也知其非一日而敗而試為之則天下之事終亦必敗則是由於察言之不善也然而成敗之故不可不察也昔舜之時天下可謂大治矣然而君都臣俞其相戒則曰罔游于逸罔淫于樂又曰無怠無荒夫舜固無逸樂怠荒之事也然而必以為戒者防其所由也舜不以其言為過而從之是以無逸樂怠荒之事而所以成也堯之時咨天下之可登庸者故齊曰朱也可堯曰吁嚚訟可乎夫堯之心欲求天下之聖賢而付之以天下之事而放齊以朋比舉朱堯不以其言為是而卒不用故終無敗事向使從其一言之舉而用則天下之事幾何而不敗我是以書稱堯曰聰明文思而稱舜曰濬哲文明以能

察成敗於未然也然而言有似是而非者則人主何以知之曰惟至正能辨天下之邪惟至靜能制天下之動聖人必先深其思慮廣其聰明虛己以來直言考古以鑒成敗是以言之一入乎耳而事之利害計之得失昭然已在其前獨觀萬化之原而修之廟堂之上豈待於已然之後迺為慮哉然則成敗之機在察言信矣

中庸論五首

一

聖人之道必始於小而後至於大必始於微而後至於顯其始也入乎毫末而不足以為小其至也塞乎天地而不足以為大此道之所以難言也中庸者聖

人言性之書也出於孔子而傳於子思其為言也精
微其為道也閎深嘗試言之記曰君子戒慎乎其所
不覩恐懼乎其所不聞君子之道盡於此而已乎是
不然君子於其所不覩不聞之間出處語默無愧乎吾
心然後於其可覩可聞之間動靜周旋無愧乎天下
故君子之道必始於慎其獨也人之不覩也如其欲
覩之也人之不聞也如其欲聞之也此非有之所難雖
匹夫匹婦而可知也始於修身而終於治人至於治
天下國家可以育萬物而配天地則雖聖人有所不
知也故曰君子之道費而隱夫婦之愚可以與知焉
及其至也雖聖人有所不知焉夫婦之不肖可以能
行焉及其至也雖聖人有所不能焉又曰君子之道

造端乎夫婦及其至也察乎天地此所謂始於小而
後至於大始於微而後至於顯也天下之所甚易莫
若衆人之所能者也其所甚難莫若聖人之所不能
者也以衆人之所能而教人是使易之而不勉也以
聖人之所不能而教人是使難之而不為也聖人既
曰難行之又曰易行之既曰易知之又曰難知之易
者所以喻於人難者所以喻於己蓋誘於人者不可
以不易責於己者不可以不難也始於易終於難而
不可以過乎中是故謂之中庸開之以易使天下可
得而入也嚴之以難使天下不得而輕也制之以中
使天下不得而過也夫中庸有衆人之所易行者焉
有聖人之所難行者焉有聖人與衆人之所同行者

焉子曰人皆曰予知驅而納諸罟獲陷阱之中而莫
之知辟也人皆曰予知擇乎中庸而不能期月守也
言中庸之易而人不守也天下國家可均也爵祿可
辭也白刃可蹈也中庸不可能也言中庸之難而人
鮮能也道之不行也我知之矣知者過之愚者不及
也道之不明也我知之矣賢者過之不肖者不及也
言中庸之不可過中也口之於味也酸鹹甘苦有偏
好其一者是不知味之人焉唯其五味均齊而得其
節然後適於口而和於心君子之於道也亦然不可
以過亦不可以不及故曰人莫不飲食也鮮能知味
此中庸之大畧也

二

中庸者言性之書也既舉其畧矣而未及乎性也夫
誠者聖人之性也誠之者賢人之性也聖人生而知
之者故其性自內而出自內而出者得之天而不恃
乎人賢人學而知之者也故其性自外而入自外而
入者得之人而後至於天故曰誠者天之道誠之者
人之道也又曰自誠明謂之性自明誠謂之教誠者
所以成性也明者所以求誠也誠者不勉而中不思
而得從容中道者聖人之性也誠之者擇善而固執
之者賢人之明也目之視乎色耳之聽乎聲鼻之別
乎臭口之識乎味此四者有諸內而無待於外聖人
之性猶此也譽之則勸非之則沮順之則喜逆之則
怒此四者動乎外而應之於內賢人之性猶此也聖

人先得於誠而有明者也賢人先得於明而後至誠者也夫中庸所以使賢者學為聖人也故欲誠者莫若明用明者莫若知天所謂知者何也致其知也故曰致知在格物又曰物至知知物至而後有知也知然後好惡形焉有知而後有好惡也君子則好善而惡惡小人則好惡而惡善此君子小人之所以分也夫明者有善未嘗不知焉有不善未嘗不知焉擇其善者而執之其不善者而拂之昭昭乎知所以為善知所以為不善此所謂明也此謂致知也是知之至也知至而後意誠意誠而後心正心正而後身脩身修而後家齊家齊而後國治國治而後天下平此大學之道賢人所以學而成聖者也子曰回之為人也

擇乎中庸得一善則拳拳服膺又曰有不善未嘗不知知之未嘗復行夫顏子豈無不善哉惟能知而不行也故曰欲誠者莫若明用明者莫若知致知者是以所以學為聖人之端也

中庸論

聖人之治天下未嘗不以誠也誠者存乎其心不可得而見之故其說曰惟天下之至誠為能盡其性能盡其性則能盡人之性能盡人之性則能盡物之性能盡物之性則可以贊天地之化育可以贊天地之化育則可以與天地參矣夫性者何也仁義是也聖人以為仁義者生於吾之性而不生於外是故用之以誠仁焉而必出於誠義焉而必出於誠不誠於仁

則人不親不誠於義則事不成誠仁者不施而親誠
義者不為而成誠在內者形於外是所以貴誠也是
故不賞而人勸不怒而人威不動而人化不言而人
諭此所謂盡其性也是故為人子者誠於孝為人臣
者誠於忠為人弟者誠於恭舉天下之性莫不誠於
為善此所為盡人之性也是故天地為之誠化日月
為之誠明四時為之誠行風雨為之誠節草木為之
茂鳥獸為之蕃凡在天地之間者莫不安其性命此
所謂與天地參也聖人有其德有其時有其位而行
其道堯舜禹湯文武周公是也有其德無其時無其
位而言其道孔子是也是故欲觀賢人之道聖人是
也欲觀聖人之道天地是也天不言而四時行焉地

不動而萬物生焉天地所以不言而人諭不動而物
成者何也誠之至也聖人所以無為而天下治亦誠
之至也故天者高之積也地者厚之積也聖人者誠
之積也天積於高及其遠則人不能知也地積於厚
及其廣則人不能窮也聖人積於誠及其神則人不
能測也高不積不足以為天厚不積不足以為地誠
不積不足以為聖人聖人者明並乎日月德配乎天
地惟積於誠也

四

聖人之德既與天地參然而孜孜焉常有不已之心
記曰不勉而中不思而得從容中道此聖人之性也
其行之也蓋未嘗不勉不思而終身以為不足夫聖

人之所不可及者其在此乎昔者堯舜之為君思天下有一夫不獲其所則其心耻之有一物不得其養則其心憂之夫耻之憂之者何也恐其德之有所不至也聖人之德固無所不至矣然而常以不至為心故仁矣而曰未足以為仁義矣而曰未足以為義是以有一物不被其澤者聖人之耻也其責已也如此其待人也則不然夫人或生而知之或學而知之或困而知之此三者之異衆人之所知也聖人必曰及其知之一也或安而行之或利而行之或勉強而行之此三者之異亦衆人之所知也聖人必曰及其成功一也此所以引天下之不肖者而為賢也生而知者不可以人人而求也有學而能知者焉有困而能知

者焉則與夫不學者異矣是故進而一之於聖使天下皆曰困而知者亦可以為聖而聖亦與我同類如此則孰不欲知聖人之道此所以為教也安而行者亦不可以人人而求也有利而能行者焉有勉強而能行者焉則與夫不能勉強者有間矣是故進而一之於聖使天下皆曰勉強而行者亦可以為聖而聖亦與我同類如此則孰不欲行聖人之道此所以為教也聖人所以待人者如此而其責已者未嘗不重也子曰何事於仁必也聖乎堯舜其猶病諸又曰舜好問而好察邇言隱惡而揚善執其兩端用其中於民夫其仁足以博施濟衆而猶以為病此其所以責已也好問而好察邇言隱惡而揚善此其所以待人

也夫其責己也則為善而不足其待人也則恐其不得為君子二者皆出於其性推之以治天下聖人之道未嘗有過於此者也夫子亦何為哉知所以責己知所以待人則雖欲為堯舜而無難也

五

聖人不以己能而責天下之人故擇其近於中庸者而行之曰忠恕忠恕者所以為中庸也何謂忠曰推己之心之謂忠何謂恕曰如己之心之謂恕夫聖人者天下一人而已矣衆人之所不能為也以聖人之所能而責衆人是率天下而為一人之行也記曰聖人之制行也不以己使民有所勸勉愧耻以行其言故不為人之所不能不行人之所不及動則思天下

之可法言則思天下之可道要以使人皆可以為善此所謂忠也已所不欲勿施於人人常欲為君子而不欲為小人此天下之情也以己欲為君子之心而使人皆得為君子以己不欲為小人之心而使人皆不為小人此所謂恕也仁義禮智四端之用未有不由於忠恕之道而可行也仁者過乎仁聖人不以為能也義者過乎義聖人不以為行也禮者過乎禮聖人不以為教也智者過乎智聖人不以為法也仁義禮智非獨以善一人也必使天下皆可以行之不惟使天下皆可以行之又將使後之人皆可以繼之如是而後可以為中庸之道此所以貴乎忠恕也故曰忠恕違道不遠而曾子曰夫子之道忠恕蓋堯舜三

王之治天下與夫孔子六經之道莫不由於忠恕也若夫以己能而責天下之人此老莊所以肆其放蕩虛空之論而不能自及也聖人者為天下而言者也故己可用而人亦可行老莊者為一人而言者也故己獨可言而人不可用是欲以一人之私論而率天下以行之也其意曰治身者曷不為我之等貴賤齊生死治天下者曷不為太古之為無為事無事是以言之而不可行也聖人之言其自為也過少而為人也過多老莊之言其自為也過多而為人也過少此其所以異也老莊之說如此而好之者或以為治性之書是不然夫治性者莫如中庸而亂性者莫如老莊故學中庸以治其性則性可得而見也學老莊以

亂其性則性不可得而反也惟不惑乎老莊之言則可與由中庸以入於堯舜之道也

策問

省試策問二首

問古之士與君言、使臣與人臣言、事君與幼者言、孝悌與居官者言、忠信自童子以至於成人自洒掃應對以入於道德學不凌節教不躐等有非其所問而問者鄉先生君子不以告也譬如拱把之桐梓長之養之至於成材無不適於用如其未至而曰至未能而曰能則是賊夫人之子非先王長育之意也蓋孔子之教曰文行忠信興於詩立於禮成於樂孟子曰謹庠序之教申之以孝悌之義其所教者

皆以明人倫也以孔子之聖四十而始不惑五十而知天命雖曰知之猶罕言之性與天道自子貢不得而聞况其下者乎近世學士大夫自信至篤自處甚高或未從師友而言天人之際未多識前言往行而窮性命之理其弊浮虛而無實鏗薄而不敦雖然十室之邑必有忠信天下之大豈無豪傑不待文王而興者然聖人之教必為中人設也比年以來朝廷患之詔禁申韓莊列之學流風寢息而猶未絕夫申韓本於老而李斯出於荀卿學者失其淵源其未流將無所不至故秦之治文具而無惻隱之寔晉之俗浮華而無禮法之防天下靡然卒至大亂此學者之罪不可以不戒也子大夫以文行舉於鄉羣至於有

司且登進於朝廷風俗之媿惡政事之得失將於此乎在必有中正之論以掖斯弊其悉陳之問二帝三王之道亦惟仁義而已矣孔子傳之詩書所述為萬世法其要不過曰稽古法天修身親舉賢而用之其言甚易知則宜其事甚易行然自三代以還後世之治終莫能及焉由漢至于有唐其間明君賢臣為不少矣其治曾不得度幾於古何耶豈其學者論卑而不足以有明歟抑其時君不能勉而行之歟昔孟子非堯舜之道不敢陳於王前與王言未嘗不以王道如其不可行豈徒為空言哉以區區之齊五十里之滕孟子猶欲勉之以王况不為齊滕者乎夫道之不明也學者不講之過也既明矣而不行

者在上者之過也古之學者講而明之所以待在上者舉而行之四代養士於學校蓋以此也子大夫學於此久矣其茂明之

太史范公文集卷第三十五

太史范公文集第三十六

記
序
銘
書

龍門山勝善寺藥寮記

龍門距浴城十五里其西山有浮屠祠曰勝善興於唐開元而壞於五代迄本朝太平百餘年諸祠稍復葺而勝善尤古未能興之事之興敝存乎其人藥寮者太尉潞國文公之所建也公閔下民之疾苦而不得其療者思有以濟之相其地得勝善祠之下方當關塞之阨水陸之衝南北之通塗而行旅之所便也其山出泉曰真珠泉公出俸錢命工徒疊石以為址即泉為藥井而建寮於其上十有三楹是歲熙寧

六年也公又以勝善為功德寺擇僧之知醫者為寮主以長之出醫書數百卷家之良藥珍劑輸之寮和藥之器用備焉凡郊野之民無有遠邇與道路之往來有疾病者造寮而請之其施與無窮所及者之衆可知矣寮之上則泉之所出也為堂曰珠淵其南則三嵎為屋以覆大像又其南曰第四嵎亦屋之於是勝善之祠復新人之至者有遊息之所故樂而忘其勞而藥寮之地益加勝矣其東俯視伊水暉光澄澈望香山石樓若屏障圖畫蓋天下奇偉之觀也王公大人建祠宇修福田者有之矣未有濟民拯疾誠意之篤如公者也民受天地之和以生陰陽寒暑之不時飲食動作之不節於是有所癘疫之災札瘥之昏聖

人為之醫藥以救其夭死三代以後醫師職廢民之有疾者無所控告於其長上有志之士雖或能施而未光也公視人之疾若己赤子建長利圖廣濟前民之患而為救以待之俾民不勞而獲醫不費而飲藥古未有也惟公左右三朝勤施四方陰功顯德被于民物不可遽數其著見於洛邑者如此可謂仁矣古之君子思一夫不獲其所如己推而納之溝中唯能推己以及人也孟子曰有不忍人之心斯有不忍人之政後之君子觀是寮也則知公之心知公之心則知公之政知公之政則朝廷德澤之厚從可知焉來者守之其勿廢也其嘗侍坐於公：語及藥寮顧曰子為我記之某不敢辭公之命退而書其事云元

豐六年十月日奉議郎同編修資治通鑑范某記

賜墨記

元祐三年三月十七日修神宗皇帝一朝寔錄於門下後省開局賜李廷珪真墨臣某謹記

中使李永言

司馬溫公布衾銘記

溫國文正公所服之布衾隸書百有十字曰景仁惠者端明殿學士范蜀公所贈也曰堯夫銘者右僕射高平公所作也元豐中公在洛蜀公自許往訪之贈以是衾先是高平公作布衾銘以戒學者公愛其文義取而書於衾之首及寢疾東府治命歛以深衣而覆以是衾公於物澹無所好唯於德義若利欲其清如水而澄之不己其直如矢而端之不止故其居處

必有法動作必有禮其被服如陋巷之士一室蕭然圖書盈几終日靜坐泊如也又以圓木為警枕小睡則枕轉而覺乃起讀書蓋恭儉勤禮出於天性自以為適不勉而能與二范公為心交以直道相與以忠告相益凡皆如此其誠心終始如一將歿而猶不忘其觀公大節與其細行雖不可遽數然本於至誠無欲天下信之故能奮然有為超絕古今居洛十五年若將終身焉一起而功被天下內之嬰童婦女外之蠻夷戎狄莫不敬其德服其名唯至誠故也公兄子宏得公手澤紙本于家屬某序其本末俾後世師公之儉云元祐三年七月壬子范某謹記

和樂庵記

河南張子京結茅為庵於其所居會隱之園元豐中
司馬溫文正公為隸書以名之取常棣之詩兄弟和
樂云後十年子京書與余曰庵得名於溫公近以雨
壞復新之溫公沒矣是不可忘也子其為我記之始
余以熙寧中入洛溫公方買田於張氏之西北以為
獨樂園公賓客滿門其常往來從公游者張氏兄弟
四人出處必偕余每見公幅巾深衣坐林間四張多
在焉或奕棋投壺飲酒賦詩公又鑿園之東南墉為
門開徑以待子京之昆弟杖屨相過於流水脩竹之
間入乎幽深出乎蔭翳乃得是庵焉美木嘉卉四時
之變無一不可喜者賓至則兄弟倒屣怡怡然信所
謂和且樂也溫公與其兄伯康友愛尤篤伯康年將

八十公奉之如嚴父保之如嬰兒每食少頃則問曰
得無飢乎天少冷則拊其背曰衣得無薄乎康伯入
浴則二家兄弟日相從游其名子京之庵不惟以善
張氏亦公之志也詩曰凡今之人莫如兄弟外物之
娛悅其有可以易此者歟張氏伯曰明叔仲曰才叔
次則子京季曰和叔自其先君棄官隱居園池之美
為洛之冠子孫不墜其素風而大賢以為鄰有德義
之益之可尚也已足庵也其與獨樂之園久而人益
愛之宜子京欲為之記而余不得辭也敝又新之其
勿替哉

太師堂記

神宗熙寧六年潞國文公以司徒侍中河東之節自

樞府出鎮三城明年留守北都後七年拜太尉保釐
洛宅又三年以太師就第今 天子嗣位元祐元年
起公平章軍國重事元老在朝海內晏寧五年復請
老章數十上 二聖不得已許之以公位極宗臣無
以復加聽解重事以維師舊節歸老于洛六年十二
月 詔以公之子集賢殿修撰周翰守三城明年二
月周翰迎公安輿至河陽父老覩公儀形擁道謹呼
如見父母蓋自公去鎮十有八年而公之子繼守是
邦流風善政相望不遠公既老而復臨之故邦人皆
喜以為不獨公家之光寵亦朝廷之盛美也府舍瀕
河地鹵下濕庠陋不葺上雨旁風不足以奉几杖羞
旨甘周翰因其舊廬治而新之榜曰太師之堂朝夕

溫清問安侍膳其中公作二詩以識其事逍遙游燕
踰月而後歸洛周翰既以公詩刻之石又以書來曰
子為史官為我記之其觀古堯舜之君壽皆過百年
其臣亦無不耆老子孫有國數百歲而不絕周公老
于豐魯公封於魯凡蔣邢茅昨蔡皆為諸侯召公相
四世其子封於燕成王之封周公也周公拜前魯公
拜後所以康周公也傳曰周人之思召公愛其甘棠
况其子乎夫其相如此則其君之德可知也惟潞國
公光輔 四朝功格上下垂五十年事載冊書由今
觀之邈若古昔天錫之報壽考康寧八十有七而聰
明不衰由漢以來輔相之臣福祿之盛未有如此比
者雖三代而上唐虞之際歷選賢哲無幾人焉是以

外至四夷敬仰公名或瞻望而歎息或聞風而獻馬
此豈可以聲音笑貌使之然哉蓋其陰德之所被者
廣仁聲之所及者遠愛公之深者不獨孟人而已然
則斯堂之作其在周翰如魯公之養周公其在孟人
如召國之植甘棠於以勸天下為臣子者之忠孝為
人父者之慈訓其永無窮惟後之人勿替引之元祐
七年四月丙子試尚書禮部侍郎兼侍講國史院修
撰范某記

序

唐鑑序

承議郎著作佐郎臣祖禹受 詔與臣光修資治通
鑑臣祖禹分職唐史得以考其興廢治亂之所由昔

隋氏窮兵暴斂害虐生民其民不忍共起而亡之唐
高祖以一旅之衆取關中不半歲而有天下其成功
如此之速者因隋大壞故也以治易亂以寬易暴天
下之人歸往而安息之方其君明臣忠外包四荒下
遂萬物此其所由興也其子孫忘前人之 勤勞天
厭於上人離於下宇內地裂尺地不保此其所由廢
也其治未嘗不由君子其亂未嘗不由小人皆布在
方策顯不可揜然則今所宜監莫近於唐書曰我不
可不監于有夏亦不可不監于有商臣謹采唐得失
之迹善惡之效上起高祖下終昭宣凡三百六篇為
十二卷名曰唐鑑唐之事雖不能徧舉而其大畧可
睹矣元祐元年二月日臣謹上

東宮錫燕集序

上之元祐二年秋九月壬戌御邇英閣召侍臣講論語畢甲子賜燕于東宮命宰臣主之執政及講讀起居之官預焉遣中使勸侑命卒飲所以寵勞甚厚中燕又遣中使賜御書唐人詩各一首凡十有三人拜賜于庭捧觀皆驚歎喜拊太師彥博以疾不赴遣中使就第賜之翼日彥博以下上表謝講讀起居之官又進詩以謝於是寫而輯之臣某拜手稽首言曰伏羲氏觀河圖畫八卦始為書以紀萬事昭明天下聖人務焉洪惟祖宗皆好筆札皇帝生知天縱典學日新繼文守成克篤前烈聖作神契得之自然而嗣位以來群臣未嘗獲覩真迹今茲儒臣首被此賜

非夫稽古好學研精儲思丕承列聖之顯謨奉若文母之慈訓則何以躬勤翰墨假寵諸臣如此其至乎其輯題曰東宮錫燕寘于資善俾有司掌之以為故事既又各藏其副以傳之子孫元祐二年九月日臣某謹序

古文孝經說序

古文孝經二十二章與尚書論語同出於孔氏壁中歷世諸儒疑眩莫能明故不列於學官今文十八章自唐明皇為之注遂行於世二書雖大同而小異然得其真者古文也臣今竊以古為據而申之以訓說雖不足以明先王之道庶幾有萬一之補焉元祐三年八月日臣謹上

仁皇訓典序

臣竊以語聖人之德必以甚盛者為稱觀先王之治必以所多者為尚堯以仁舜以孝禹以功文王以文皆其甚盛者也夏之政忠商之政質周之政文皆其所多者也三代以後其德不極其治不純然而亦必有盛多者焉漢孝文之恭儉唐太宗之功烈考之三王抑其次也惟我 有宋受天眷命 太祖無心於有天下而神器歸之至仁如天神武不殺終捨其子以授 大聖堯舜傳賢不是過也 太宗繼文海內為一 真宗守成治致太平至於 仁宗當勝殘去殺之運制禮作樂之會光有天下四十二年 宋興以來享國最久修身於一堂之上而置天下於太山

之安端拱於法宮之中而躋一世於仁壽之域舟車所通日月所照無思不服威靈在天既三十年仁深厚澤淪浹海寓流風未息故老猶存窮山窟穴之氓言之則流涕被髮左衽之俗聞之則稽首用能光大累聖無前之烈恢建 後嗣無窮之基昔周公作無逸本之太王王季以及文王追配三宗四人迪哲多稱文王之德以勸成王取其可以為者也昔漢自高祖至于肅宗非無賢君而漢世之治獨稱孝文唐自高祖至于宣宗亦非無令主而唐世之治獨稱太宗皆取其子孫可守以為成憲也洪惟 本朝祖宗以聖繼聖其治尚仁而 仁宗得其粹焉古者史為書以勸戒人君唐史官吳兢作貞觀政要 仁宗時命

史臣編 三朝寶訓神宗時亦論次 兩朝之事
陛下又命臣以 神宗之訓上繼 五朝以脩邇英
進讀日陳于前考自三代以來未有 六聖相承其
德克類者也恭惟 仁宗言為謨訓動為典則寔守
成之規矩致治之準繩臣謹錄天禧以來訖于嘉祐
五十年之事凡三百十有七篇為六卷名其書曰
仁皇訓典以助睿覽庶有萬一之補焉元祐八年
正月日臣祖禹昧死謹上

銘

義塚銘并序

余叔父故通直郎舉夫人故華陽縣君宇文氏捨田
於成都東郭之外以給死之無葬者戒子孫使勿廢

其事子龍水主簿祖亮請余記之余名之曰義塚而
揭之以銘曰吾嘗觀於比邛之原聖賢所藏歎萬古
之同此究終始其何鄉物生於土而及於土惟人之
化欲人之不覩是以聖人教民葬之中野太古不墳
厚衣以薪末世厚葬澆風變淳君子之於天下不忍
一物不得其所故已有餘則推以及人鄉人有死葬
於何所縣曰華陽鄉曰積善里曰東廟白土之間范
氏之田松柏丸丸骨復于土魄化為泉誰謂無歸於
此終焉其無忘吾叔之德而返汝魂氣于天

書

荅劉仙尉書

某啓人至辱書承令叔令弟相繼淪謝想悲痛可勝

言邪嘗謂道純氣節不減先正惜其一病遂廢不為世用今又止此甚可歎也讀足下所為亡弟述又恠天賦其才如此而不予之壽豈所謂難諶者哉足下史學足以繼先正譬如美木已有千尺凌雲之勢在所長養以待他日之用耳足下勉之無以悲傷摧損其志古之人困窮而通有憂患而啓發事業者多矣劉氏門戶所繫唯在足下可不念哉寄示先正墓碣石刻甚精十國紀年序欲求張左司書已面懇許諾温公之文張固不惜書也近資治通鑑印本奏御因思同時修書之人墓木已拱存者唯僕尤可感歎人生會歸於此但有先後耳足下所寄紀年留此甚久京師殊苦少暇方將寫本校正蜀中求人刻板猶

須一二年乃可成唯不訝其緩春暄千萬厚愛不宣
某頓首

荅晁教授書

某頓首教授晁君足下某聞足下之名久矣以未得見為恨承過京師乃辱示書將先屈致顧某無似何以當之某始聞足下於司馬公休又黃魯直道足下為揚子雲別傳公休魯直皆某心慕而畏服者其稱道足下不容口是某已得足下於二君矣然子雲別傳亦未之見也譬如工人聞一美木賈人聞一至寶欲見之意何如哉恨以拘出入之禁不得走館舍然幸識尊公風采有家世之舊且與校書聯識事群從獲見者非一也古人或相望於千里或相得於異世

未識其面往往已知其心况今相因已如是乎或車
從尚少留休日不鄙如書所戒幸甚幸甚某再拜

傳

康節先生傳

邵雍字堯夫衛州人家世貧賤雍刻厲為學夜不就
席者數年雍嘗適吳楚過齊魯客梁晉而歸徒居于
洛蓬華環堵躬爨以養父母講學於家不彊以語人
而就問者日衆士人道洛者必過其廬雍與人言必
依於孝悌忠信樂道人之善不及其惡故賢不肖無
不親之病畏寒暑常以春秋時乘小車二人挽之行
遊城中所過倒屣迎致居洛三十年洛人共為買田
宅士大夫多助之者雍皆受而不辭為人坦夷無表

襍防畛不為絕俗之行其學自天地運化陰陽消長
以數推之逆知其變自以為有師授世無能曉之者
而雍內以自樂浩如也有書十二卷曰皇極經世詩
二千篇曰擊壤集雍初舉遺逸試將作監主簿熙寧
初以為潁州團練推官與常秩同召雍卒不起卒年
六十七知河南府賈昌衡言雍行義聞於鄉里乞贈
卹吳克請於上贈秘書省著作郎賜粟帛韓絳守
洛言雍隱德卹園聲問顯著賜謚曰康節

王延嗣傳

唐宋間延平郡有隱君子姓王氏諱延嗣字繼先光
州固始人也世為州里豪右從父潮審知俱以勇俠
霸於一鄉唐末之亂四方豪傑競起大者以王小者

以伯壽春王緒攻陷光州得潮兄弟相持大喜曰恨相得之晚因留軍中計事將為誅巢之舉時秦宗權約會兵討賊審知語於緒曰此何足以成事哉遂逗留不進宗權為巢敗走大怒以兵攻緒乃南奔入閩有衆數萬而緒以猜刻失將佐士卒心一夕為亂軍所斃推潮為主師遂奄有福建景福元年唐拜潮福建觀察使審知為副使潮卒審知代立乾寧四年唐升福州為威武軍拜審知節度使累遷同中書門下平章事封瑯琊王君幼失怙恃養於審知為兒童時謹愿端慤如成人未嘗戲笑事審知如父晨昏侍左右彌謹審知寢疾躬奉湯劑未始須臾離庭闈雖甚勞苦不見有倦色審知亦以是器而憐之撫如己

子審知諸子豪氣相高日以馳馬試劍為事君獨泊然無欲惟喜耽玩書史夜以繼日手不釋卷寢食為之幾廢故多識前言往行提身行己每以古人自期儒冠書服雍容委折似不能言者然邦有大故國有大疑將就謀焉則引古驗今抵掌議論凜凜風生不可尚已審知嘗戲謂之曰此我家措大兒也審知既撫有全閩將欲錄君以官君聞之力辭懇免至于三四不聽乃稱疾不出者逾月審知使人往訊之因手書以上審知其畧云春秋傳載孔子之言曰惟名與器不可以假人蓋以名器者國家礪世之具苟上有私授之失則下啓奸覲之心居平世猶之可也况今天子播遷大盜蠡起迹其所由正緣朝廷政出多門

刑賞滋濫大王親舉義兵為國平亂軋於賊臣決策
入閩士卒將佐棄鄉井墳墓捨父母妻子從王南征
何所圖哉志於立功名耳今師旅暴露日久大勲未
集大王膺茅土之封領節鉞之寄肅將明命作鎮于
閩尚未班爵策勲以旌戰士而首欲以爵命猥及無
知之私親將士觀望解體必矣昔衛懿公好鶴、有
乘軒者及狄伐衛授甲者皆曰使鶴、寔有祿位僕
雖愚曹粗靈於鶴儻或僥榮冒祿偷安利己以陷王於
衛君之地雖粉骨糜肌亦不足以贖其過審知以其
言切利害益器重之然終不能奪其志稍寢其命曰
姑俟他日而已未幾唐亡梁太祖拜審知中書令封
閩王仍升福州為大都督府命至閩審知將拜賜焉

君力諫之曰吾家本田舍郎二父蒙國厚恩迭秉節
旄朱全忠賊臣固嘗與我比肩事主徒以挾穿窬之
資逞豺狼之暴肆虐流毒盜有神器人神共憤其能
久有此土我縱不能如留侯為韓復仇沛公——為義帝
發喪其忍北面以事之義不帝秦此其時也審知俛
首久之曰此特腐儒陳言無補寔用知彼不知己兵
法所大忌彼雖僭逆然既已南面朝諸侯加之堅甲
利兵半於天下東征西伐草折卵碎我憑數州之地
輒嬰其鋒是自取顛仆安能成大事哉君曰是大不
然梁雖弒逆僭舉大號而外寔於晉日夕支吾方且
不暇重以楊行密方據江淮實吾之外屏似出天造
以限南北梁人雖欲襲我得乎此正所謂風馬牛不

相及也况彼以新造之梁雄據中原大統未一內怨
外叛腹背受敵尤其甚者與晉相持雌雄未決其能
越大江度脩嶺以與我角耶故司勳杜牧有言上策
莫如自治誠能於此銳意自治內以修政外以治軍
使府庫克實兵革犀利如小白之於齊勾踐之於越
國勢日張霸圖日盛近約吳越遠結江淮外連荆楚
仗義合兵為國討賊其誰敢不從孔子曰如有用我
者吾其為東周乎反覆條陳數百言審知竟不能用
其策君拂膺太息私竊嘆曰大丈夫以氣為主氣先
索矣無能為也審知歲時遣使朝貢于梁阻於江淮
道不能通乃航海從登萊入汴使者入海覆溺大半
君聞之愀然因復為審知歷陳梁無足畏之狀勿傷

財損人以自誣且言治亂之機常隱於冥冥而自古
觀人之國則每預見而前知者蓋勝負之形已分矣
如齊仲孫知魯之未可動房玄齡謂隋之必將亡莫
不若合符節以今形勢觀之則朱梁決不能為我患
萬無足畏然異時作難當在江表吳越之間其後果
然審知初不甚領畧其意自是君始浩然有隱遁巖
穴全身遠害之志而牽於審知有鞠育之恩於己念
未有以報之不忍遽遂翩然初潮卒審知代立疑外
議有未甚服從者會僚屬有獻言請以威嚴繩下之
不從令者審知始用其言乃務以誅戮為事君言於
審知曰書云臨下以簡御眾以寬語云寬則得眾信
則民任焉敏則有功公則說此萬世治國齊家君天

下之大法也小人中無遠慮乃導王以苛虐為政不亦悖乎王緒之失實本於是覆轍在前王所目擊可不戒哉審知亦為之改容君每侍審知左右覺微有怒色必怡聲軟語進說以解釋其意前後有犯顏垂死必有後也復活者蓋千餘人識者固已知君陰德之必有後也閩俗喜佛而審知亦溺於浮屠氏之說窮極土木之功以興佛宇財力殆困君力言於審知曰書云不作無益害有益功乃成浮屠氏本物外之人以寂滅為宗非有益於人之國今乃蠹民財損民力以從事于斯是謂作無益以害有益也古之人君自謂善於其事者無出梁朝之武帝及其終也卒無補於侯景之亂殷鑒不遠在夏后之世矧夫今日方

欲以取威定霸其可崇此不急之務以蠹國傷民耶審知卒不悟自此帑藏日虛民力日困矣審知本武夫初不省禮樂詩書之教其後折節下士開學館育英才故唐賢士大夫避難南來者皆厚禮延納之招來蕃舶綏懷海上諸蠻貿易交通閩俗康阜皆君有以啓之審知諸子皆不肖服飾車騎侈異相勝視君敝衣緼袍菜然率皆非笑有從而諷君者君正色徐以語之曰傳不云乎儉德之共也侈惡之大也以漢文之賢君而衣弋綈以公孫之賢相而用布被後世以為美談况處多虞之世雖萬乘之尊三公之貴尤當以漢文公孫為法顧予何人既無汗馬之功復無籌幄之位徒藉季父之貴得依餘庥不耕而食不織

而衣優游卒歲無所用心日夕兢惕尚虞滿盈以速禍敗矧敢不衷其服自蓄厥身諸子為之忸怩審知雖起於任俠之徒而天性純儉自奉甚薄聞君此言嘉嘆不已時自朱梁篡唐之後強藩巨鎮相次僭號改元審知王閩日久驕心日滋屢有效顰之意君極口切諫其不可曰自古帝王之興莫不皆有大功德著於天下故天命有歸人心胥附然後應天順人起而君之固非細事當紂之時西伯躬盛德大業三分天下已有其二而服事殷曹孟德剗平禍亂威震天下挾天子以令諸侯盜弄神器於掌股間漢之為漢特位號耳而猶終於其世不敢登尊履極蓋以天命人心之有在耳今王雖聰明英武出於萬夫之上然

功未著於中原威未加於海內蕞爾之閩地不大於吳楚兵不加於梁晉而輒欲謀此大事諸鎮聞之稱兵而南則師直為壯我復何辭是乃操無益之虛名享必然之實禍僕嘗諫王勿臣朱梁且王以僕言為不知彼已而今日不意復為此圖其可謂知彼已乎誠於此時檢身脩德惟懷永圖敦睦鄰以大桓文之業則生享方面之尊歿存忠義之名以垂裕後昆無有窮已不其韙歟今乃不此之思而謀為劉聰石勒之舉縱使諸侯未暇致討得以偷安假息一旦有真主出其能赦我哉審知雖不樂其言然志之於心終其身不失臣節君之力也審知諸子君素惡之而獨與延政善及審知卒延翰竊立君謂其所親曰此

真沐猴冠耳延翰聞而憾之君因約延政同隱延政
唯諾然志於得國不行一日延翰取司馬遷史記閩
越王無諸傳示諸將吏曰閩自古王國也吾今不王
何待軍府將吏因勸進君曰是可為也孰不可為也
此子能自免乎使在先王之世予固當以死爭然斯
人也何足與語吾族其血矣乎我雖不能餓死首陽
然亦豈可延頸待戮因潛隨賈舟逸去將欲遵海濱
而處偶值閩使者自海上還遇君迫之以歸至黃崎
君乃捨舟宵遁田間道草宿露行旬日始抵延平因
愛其佳山水遂有終焉之意乃易姓唐以字為名蓋
以唐與王音韻相近而亦自謂唐之遺民於是隱焉
時延平人物凋零鄉無校家無塾士風不振青衿之

徒散之城闕君始以五經教授學徒人皆以唐五經
呼之未幾國亂骨肉自相屠戮繼而南唐兵敗閩王
氏族屬靡有了遺皆如所料僅脫於難者惟君一人
自非明哲保身其能爾耶君初聞閩滅乃哀經出郊
東望故國一酌先王大慟而還曰天作孽猶可違自
作孽不可逭王氏之滅非天也亦自取之爾復何言
哉始李景之滅閩也乃以富沙延平劍浦三縣為劍
州刺史陳誨將欲興建黌館以延多士初聞唐五經
之名始議表君教授俊造君聞之曰昔孟軻氏不以
三公易其介使富貴如我所欲則冠貂蟬秉節旄久
矣惟夫不以易其介故所以遁世而無悶遂以廢疾
謝絕賓客終日杜門雖比隣亦莫得見其面環堵蕭

然卒於大宋乾德四年壽九十有四娶黃氏先卒於
閩晚得一子曰玠有賢行秀而不寔娶鄭氏有子一
人曰餘慶治家有法輕財重義鄉閭之人皆以仁厚
長者歸之娶邱氏有男六人女二人二女皆適士人
男曰說曰詢曰綬曰端曰靖季子早亡餘皆業儒端
一舉中嘉祐八年進士第今為河陽節度推官有文
有守不忝厥祖施諸政事所至皆有仁聲娶魏氏卒
而無子繼室徐氏生二女一男皆幼稚男曰淮先是
君之寢疾也呼其子玠而囑之曰古者士踰月而葬
葬言其藏也令人不復可見邇近世流俗之葬孝子
慈孫欲榮其親者墓惟恐其不大馬鬣惟恐其不高
而又旁揭豐碑褒揚盛美彌亘道左是皆無益於亡

者適所以為寇盜發掘之標唐宋之亂王公貴人賢
士大夫例遭此禍路旁每見為之動心可不戒哉我
病且死汝則埋之切勿徇俗以陰陽風水吉凶為拘
忌但擇高明爽塏之地免卑濕沮洳足矣不封不樹
勿為標識銘誌碑碣之具聽人耕種其上芻蕘雉兔
往來勿禁慎毋蹈衰世餘習自貽後悔及君卒其子
玠葬君于水雲村之原一如治命及玠之卒也子餘
慶方在襁褓玠始病篤因自取針刺其姓於餘慶之
右臂及封乃祖遺書數卷留以付之喪服既除其妻
持孤子適他族洎餘慶長而母亡惟見臂字遺書而
已迄莫辨其祖所葬之地日月既邁詢之鄉老亦無
有能知之者至今子孫春秋拜掃展省合祀於其子

玠之墓耳嗚呼如君之全身遠害也何其慎終惟始
而其長慮却顧又何其遠也世之小人嗜利亡軀朝
不謀夕其視於君為何如哉祖禹嘉祐中就試禮部
始識君之曾孫端於京師逆旅中與之語喜其有誠
明自得之學不入時輩每親炙之是年端登進士丙
科而祖禹亦幸塵忝自入仕契闊二十餘年一日邂
逅於河陽幕府雖其淹回沮抑而氣未嘗少衰於曩
時倘非以其所學充其所養能爾耶祖禹近參訂唐
史事有疑似者數條質之於端悉能援引他傳雜說
拜唐文士碑銘書疏之類以決其疑莫不皆有證據
予深德之而且嘆其博洽端因發蠹篋出乃祖遺錄
相示曰曾大父生於晚唐長於五代而卒於國朝之

初經歷甚多閱世甚久惜其晦迹不仕不得託名於
一代史書前輩已往知者絕少第恐將遂湮沒為子
孫者不得無罪吾子其能為我發潛德之幽光乎祖
禹曰唯謹以君出處遺事而次第之以為家傳直述
其言與其所行耳不敢置一字褒貶於其間庶幾子
孫稍得其實後之君子尚論古人者見其傳而得其
人則是非美惡於是有所在固非祖禹所得專也傳成
歸之於端俾藏祖廟以為無窮之傳云
贊曰甚哉出處君子之大致也五季之亂極矣聞人
奇士不幸生於其世未有不被其汙蟻者求之於傳
蓋無完人君獨能歸潔其身視軒冕若將浼焉彼其
克享眉壽始終名節垂裕後昆在當時豈不謂之難

得哉况乎議論磊落本乎純正有晉叔向唐陸贄遺風尤非五代間諸臣所能到使之一旦立人之朝食人之祿想其正色凜凜臨大節而不可奪惜其埋光匿影其在當年猶不可得而見况後世乎是知自昔英雄豪傑義夫節婦跡不踐於中朝名不登於太史聲名文采與草木俱腐者可勝計哉司馬子長謂伯夷叔齊微孔子則西山之餓夫耳渠不信然

太史范公文集卷第三十六

太史范公文集卷第三十七

青詞

祭告文

哀詞

誄文

青詞

代文潞公交歲設醮青詞

伏以上天孚佑雖高而聽卑大道無為至虛而善應惟誠可達有感必通適臨交歲之期欽奉祈祥之典輒申精懇仰扣上真伏念臣幸以微生獲逢嘉運入登上宰出涖齋壇久塵三事之榮復玷上公之秩寵祿已踰於涯分勤勞無補於涓埃矧加告老之年未遂遺榮之志懼害盈之有咎恐非據之生災每夙夜之自思若冰淵之俯蹈敢忘齋祓祇事薰修伏望玉闕宸君璿穹真聖特迴靈睭俯徇愚誠永綏耆艾之

躬申錫康寧之祉一門之內均慶善以蒙休四序之
間常安和而迪吉

又

伏以元皇布氣群物流形大昊司春四時更始凡居
覆載皆荷亨嘉適臨交歲之辰敢用祈祥之典輒殫
精懇仰扣上真伏念臣幸稟微生夙蒙休運被三
朝之眷運塵上衮之尊榮曾無補於明時顧久尸於
厚祿頽光將迫告老未從恐貽非據之災自取疾顛
之咎是以虔依道妙祇按仙儀伏望金闕宸君璇穹
衆聖曲垂昭鑒大降鴻私保茲衰晚之齡錫以康寧
之福冀終身之佚樂壽考維祺俾闔宇之靖安子孫
逢吉仰高明之臨下期志願之弗違

祭告文

河南府祭 太皇太后文

維年月日具官臣某敢昭告于 大行太皇太后臣
聞坤厚之德所以配乾元闕睢之風所以始王化自
昔三代之盛暨于兩漢之興皆繫內助之賢以啓後
人之慶恭惟睿德光越前聞篤生王家進儷宸極輔
佐 仁祖表正宮闈保佑 英皇統臨天寓勉狗聽
朝之請旋申復辟之文仁覆萬方功流億祀懷生之
品被澤無窮 皇帝出震承乾自家形國問安內寢
侍膳東朝極四海之尊榮盡兩宮之孝養而穹旻降
禍軒曜淪輝颺駕上賓日御遄改山陵備禮儀卜衛啓
行臣分職留都奉嚴復土駿奔道路祇率典司敢薦

薄儀用伸微懇謹具牲酒之奠瞻望靈駕臣無任攀
號殞越之至伏惟尚饗

百官祭文

恭惟 聖宋受命 祖宗垂統重熙累洽與天無極
寶賴內有淑德之助輯寧家邦伏惟 太皇太后誕
生勲族陟配 仁祖母儀萬國表正六宮翊奉 英
宗越升明兩遭家多難稱制從宜罔踐外朝亟復明
辟逮夫 皇帝嗣膺寶歷尊奉 祖闡率四海之歡
心極 兩宮之孝養宜錫丕祉壽如岡陵奄違聖日
哀纏宸極痛結海內今山陵備禮容衛屆涂臣等服
在具寮留司洛邑駿奔夙夜不遑啓處敢薦薄礼用
昭精誠伏惟尚饗

提轉祭文

昔者虞美皇英罔顯詒謀之慶周稱任姒不聞戡難
之功歷觀載籍之所傳未有擅名之能備恭惟 太
皇太后自家鍾慶惟聖定祥體柔明而配天本靜專
以法地若其教風之所成就德業之所維持——子孫
繼聖以相承社稷再安於獨運儀形天下表正人倫
享至養於 兩宮視太平者四紀宸闈淵默宜受祐
於無窮仙駕徇翔儀御風而莫返人神懷痛夷夏遏
音將祔因山之安爰臨同軌之會臣等任聯部按職
預駿奔覩容衛以增哀奉牲牢而述事伏惟尚饗

河南府祭濮王夫人文

維年月日具官某謹致祭于濮安懿王夫人惟靈生

自茂族克配賢王柔範令儀四德式備輔佐君子有
夙夜之勤嚴事先祖有齊潔之志奉采蘋之職成鵲
巢之風子孫衆多福祿光大宜家之義流慶無疆自
奄違王國日月既遠今得吉卜歸祔寢園轎車在涂
爰及封境敢具薄禮靈其鑒之尚饗

百官祭文

風姓之後國於任城胙土命氏其源蓋遠惟靈圓精
挺質方祇稟秀柔儀令範歸于王家輔佐君子祇勤
夙夜嚴恭內事精一其德自先帝之世疏恩啓封
奄違聖時日月悠遠既得吉卜克祔寢園轎車在涂
爰及封境恭致薄奠靈其鑒之尚饗

提轉祭文

自昔聖賢之所由興邦家之所以御雖本身修實資
內助懿厥碩人夙欽師傳惟濮定祥起家是据輯睦
内外式安且譽王有蒸嘗蘋蘩是具王有嘉賓豆籩
孔庶如何不淑奄先朝露歲月其逝音徽如故背平
臺以即遠遡寢園而將祔旒晚飄風松深隱霧盛禮
惟稱新阡是固某等任列外臺職當陪赴祇薦薄奠
惟誠之寓尚饗

濮惟大國宗室之尊宜有令德為之內助惟靈生稟
慶善歸于王家輔佐君子祇勤婦職協睦宗族罔或
時怨宜降年有永受福無疆而鳴玉早闕光儀杳遠
播美彤管流芳舊宮歲時既易宅兆未卜今屬盛禮

從祔園次銘旌所屆遠道有輝某等職在封圻敢薦
薄奠尚饗

祭叔母宇文氏文

維元豐七年歲次甲子正月辛丑朔二十日姪左奉
議郎同編修資治通鑑某謹脩時羞清酌之奠致祭
于縣君叔母宇文氏之靈有唐之季中原荼毒宇文
及范自秦徙蜀歷世昏姻著于邦族惟我叔母我之
自出王姑之子先祖之甥歸我叔父媿德賢明為婦
孝恭為母慈愛子孫既多福祿未艾宜享眉壽始盛
終全如何不弔遽奪其年嗚呼昔我先妣實維冢歸
同事舅姑維存叔母今也則亡靡瞻靡顧羈孤之感
每懷其故宿官于洛久去庭宇屬續踰時乃始聞訃

殯不哭帷奠不走墓哀恫未息日月如鶩寓奠祥薦
寫其衷素尚饗

祭司馬文正公文

維元祐元年歲次柔兆攝提格九月丙辰朔二十五
日庚辰門生具官范某謹以深衣肴酌之奠敬祭于
太師溫國公之靈嗚呼賢哲之生得天粹精伊尹之
任伯夷之清惟公兼之以集厥成孝悌之性感于神
明立於朝廷乃見大節莫堅金石莫明日月金鏢石
毀日昃月闕公之忠誠確不可奪山有時而裂谷有
時而竭玉有時而折斧有時而缺公之義烈直不可
屈是故三公之位不能貴萬鍾之祿不能富公貴以
德公富以義公所自有非由外致天下之士聞公之

風貪者廉懦者有立志其流波之所激餘風之所被
千世之下猶將興起克塞天地外格夷狄無有遠迹
愛戴如一三尺之童服公忠實踐行咏息被公德澤
進以天下退以天下凡民休戚繫公用捨爰立作相
六合鼓舞如熟得濯如飢得哺曰明明 天子聖后
惟母子育我黎民畀茲哲輔盡瘁憂勤不知有身終
食之間不忘愛君假寐之頃亦常在民遑恤其病以
至于沒孰有如公以身殉國某自為布衣辱公之知
教誨成就義兼父師昔聞於公生欲不欺死欲不愧
奉以周旋其敢失墜從公在洛十有三年忝命還都
公入陶甄謂別復合如形影然公今喪歸乃始長乖
流慟何及終天永懷昔者子貢築室於場嗟今不能

撫已隕傷薄奠矢辭公乎不亡尚饗

又祭文正文

元祐二年正月 日門生范某敬以清酌時羞之奠
祭于太師溫國文正公惟公靜也嶽立動也川驚宅
道之奧操治之具舉而措之事不愆素期年而定忽
失其據 二聖軫悼萬民思慕愈久愈深惟誠之著
峴首墮淚蜀人野祭方之今日曾未足紀某蚤以諸
生辱公之知從公半世以及長辭日月其逝宅兆已
卜義奔走千里赴哭官守有常又義不得公 之風
謚顧惟天下一話一言為法來者有狀有銘有贈有
謚顧惟小子復何述矣猶當執筆傳公行事詳記實
書以待良史寓奠告公鑒此精意尚饗

為范相祭鮮于修撰文

嗚呼子駿居今之世志古之道白首好學耽玩易老
見於事業發為文章治民則惠勢義則強柔亦不如
剛亦不吐邪則吾仇正則吾與余昔使蜀封部寔鄰
聞其風聲愛慕其人同分西臺晚益相親茂林脩竹
美景良辰杯盤草具笑語天真通家之好往事空陳
年將縱心乃補衮職拳々朴忠侃侃正色病不克施
終古遺直告滿三月退卧淮陽凶訃遽來我心隕傷
歸于其邱實邇吾鄉涕灑秋風酌此一觴尚饗

祭韓獻肅公文

維元祐三年六月十日具位范某謹以清酌時羞之
奠致祭于太傅康國獻肅公之靈某登公之門幾三

十載將老書局遇公洛川公言于朝為之引重雖大
鈞之宰不責報於一物而知己之賜敢自同於眾人
今公永歸不預祖奠感念疇昔實疚于懷敬薦菲薄
將其誠意尚饗

祭呂正獻公文

維元祐四年歲次己巳二月壬寅朔二十六日丁卯
壻修實錄檢討官承議郎秘書省著作郎兼侍講上
騎都尉賜緋魚袋范某謹以清酌度羞之奠恭祭于
太師申公丈人之靈嗚呼去聖已遠道學不明中庸
至德民鮮能久過與不及其失之均惟公體被中和
性涵純粹天降大任先覺斯民真宰不言化育萬物
巨浸無際并包百川從容廟堂不見聲色虛一而靜

漠然無心 二聖恭己四方莫枕非夫深造自得尚
友淵騫謨明弼諧思齊稷契何以居今之世如見古
人極深研幾宅道之妙經濟之用乃其緒餘公今云
亡梁木實壞邦國殄瘁何痛如之某辱知於公寔自
蚤歲取其迂拙遂齒昏姻知己義重踰於親愛儀刑
師表靡所瞻依追惟訓言流慟何已敬致薄奠惟公
鑒之尚饗

又祭正獻公文

維元祐四年五月庚午朔十四日癸未壻具位某謹
以清酌時羞之奠恭祭于太師申國正獻公嗚呼自
公之歿總歷旬時邦家失其著蔡善人喪其宗主緬
懷風烈猶有典刑 二聖追思衆賢景慕尚式周公

之訓共守蕭相之規庶幾有成永底于治日月逾遠
宅兆卜期某官守有常義不得往西望引領為天下
慟寓此薄奠惟公鑒之尚饗

奠申國夫人文

維元祐四年歲次己巳五月庚午朔十四日癸未壻
具位某謹以素饌清茶之奠昭告于申國夫人恭惟
天生淑德作配大賢教成于家助及于國而探蹟道
妙超出物表死生之際不累其心通儒哲士未能及
此某昔受室于穎得拜夫人退居洛陽實同淡泊音
容杳遠十有七年今從申公永宅玄壤不克躬奠慘
結于懷寓此薄禮展其精意尚饗

祭蜀公文

嗚呼昔先考大夫與公親雖父子義實朋友並游太學同年登科某自為兒童屠公膝下撫育教誨均於所生不幸早孤公實哀念及夫既冠再至京師猥以藝文隨例求舉公一見稱獎延譽於公卿之間從仕以來教之忠義屏居洛邑十有三年公每肩輿凡五六至奉侍几杖嘗聞訓言惟公實為門內知己前年承事傾喪惟公是憂上恩賜告省公于許齋詔勞問簡于聖心豈期逾年公遽薨殞平昔誨語跬步敢忘追惟慈顏邈不復覩今復蒙恩予告奔赴葬期莫此一觴心焉如割嗚呼哀哉尚饗

祭從叔承事文

嗚呼叔之文章其取科第如俯拾芥而仕不登於館

閣叔之才能其處繁劇如新發硎而任不至於公卿天惟與之聰明而不畀之壽考平生所有百未一施某與叔相從實自幼少日來月往凡四十年譬如期松栢於九霄望驂騶以千里中道而止命也奈何嗚呼叔之隕喪忠文八十上恩予告來省來哭今也不幸忠文大故復蒙賜告送喪即路一慟而訣薦此薄具尚饗

祭從叔主簿文

某至和之初越來京師叔在襁褓茂質日舒嘉祐之末再來赴舉叔始總角從師受書風姿粹美如玉之瑜熙寧元豐侍行入洛文章論議煒燁卓犖如蘭之茁以至馥郁如麟之育以見頭角如何不淑蚤世隕

落三十年間如夢一昔嗚呼親則叔尊年則姪老誰謂中年反哭妙少人生一世孰為永久譬如共行一塗至有先後其間脩短竟亦何有惟其不亡是謂不朽尚饗

祭從叔母靳氏文

惟忠文公與夫人先君有場屋之舊歲寒不改重以昏姻一為布衣一仕貴顯鄉曲士論以為美談夫人以令善承家以雍和配德舅姑稱孝宗族具宜而降年不永蚤世隕喪音容幽翳今踰十年筮日先遠即安宅兆敬薦薄禮用伸至誠尚饗

祭司馬諫議文

維元祐五年歲次庚午十一月辛酉朔六日丙寅成

都范某謹以清酌時羞之奠致祭于亡友公休諫議之靈嗚呼某昨與公休同講無逸今講書畢一篇之義已錄上之公休遊對請讀孟子今則有 詔講孟子矣此二書者公休遺意也公休雖沒已陳之說復脩上覽所請之書日講 帝前沒而言行其何所憾降生不永命也奈何此天下所共哀傷不獨朋友之痛也平生出處無不同之一朝睽隔葬不及送寓此薄薦孰知我悲嗚呼哀哉尚饗

祭趙端明文

維元祐六年歲次辛未閏八月丁巳朔 日左朝散郎試給事中兼侍講克寔錄修撰兼國史院修撰輕車都尉賜紫金魚袋范某謹令弟夔州司理叅軍祖

哲恭祭于端明殿學士贈右光祿大夫趙公之靈惟
公學于先王道備文武先帝識拔曰予方虎出入
西鄙垂二十年南伐交趾奏功于天西師有征深入
其阻公曰不然卒如公慮帝趣起公往固吾圍士
卧于邊農游于畝二聖倚公隱如長城季路一言
獷俗不盟元祐之初公求解去我寔責公追先帝
遇勞于王事以死繼之炳公心惟天實知公之云
亡朝野震驚羌使慟哭夷落失聲羊公罷市諸葛野
祭昔聞其語今見其事嗚呼人之生世于何其久惟
德與名可以不朽惟公知我義寔執友寓此奠觴以
告公柩尚饗

祭從叔母文

維元祐十年歲次壬申二月甲寅朔十二日乙丑具
位范某謹以羊一豕一清酒香燭之奠致祭于縣君
叔母程氏之靈惟靈生于相門令德淑哲作配君子
逮事皇舅惟忠文公一世師表邱園退老垂二十年
寔賴冢婦庇其家事祭祀賓客率禮不違撫育諸孤
均愛如一宜享眉壽而不永年從祔皇姑爰及遠日
敬致薄奠惟靈鑒之尚饗

告文正公廟文

維元祐七年歲次亥默涖灘二月甲寅朔二十日門
人范某謹用清酒香燭虔告于溫國文正公昔孔子
作春秋絕筆三年而沒至漢而春秋始用太史公作
史記既歷三世其書始行揚子雲作太玄後二百歲

而玄始興古之聖賢作經著書期於後世不必親睹其行於世也子雲有言聖人愈鈍而後利衆人愈利而後鈍不其然歟資治之書凡十六代一千三百六十二年可謂遠矣歷英祖考二世十九年而成可謂久矣公之精力盡於此書可謂至矣元祐之初有詔刻板摹印今已奏御頒及公卿而公父子皆不及見也此書藏於帝室副在名山今又立於學官與六籍並行天下之士聞公之名則想公之風讀公之書則見公之志千載之下其猶存也古者富貴而名磨滅者不可勝紀惟立德立言可以不朽為公相者當時則用沒則已焉去不旋踵而後之人易其所為者多矣惟公沒既久而人思益深其政在朝廷

以為準的其書在學者以為宗師公其可無憾矣今天子遣使以印本賜公家某與成此書故敢告終事于公之廟室惟昭鑒之尚饗

告先妣文

維元祐七年歲次壬申十月庚戌朔長子翰林侍講學士左朝郎國史院修撰兼修國史輕車都尉高平縣開國男食邑三百戶某敢昭告于先妣高平郡太君某奉七月癸巳詔書登進講職褒贈之典達于淵泉啓封高平錫命在笈祇服官次無由奉將天澤謹遣弟姪展禮致誠伏惟昭鑒膺茲寵渥謹告

祭妹文

維元祐七年歲次壬申十月庚戌朔九日戊午兄某

以清酌時羞之奠祭于亡妹仙源縣君之靈慶歷戊子大江之南惟汝初生後我八年夙喪先妣汝始總角先君鍾愛懷抱鞠育兄弟不夭蚤皆孤苦我來京師汝侍祖母季父是依既長有歸水陸萬里從官東西惟汝德性幽閒令淑孝事舅姑睦於姻族我昔在洛汝惟兩川自我不見幾二十年免喪東來慰我顏色汝無間言以為我戚東遊吳越道喪其子憂結于中繼之以死嗟我兄弟白首未虧今汝先我孰知我悲惟汝之夫清介特立將護汝柩返于鄉邑念汝藁殯旅魂飄揚告別終天酌此一觴嗚呼哀哉尚饗

祭從弟文

維元祐七年歲次壬申月朔日兄某遣姪公致祭于

亡弟五郎之靈嗚呼昔我先祖教訓諸孫蚤聞詩禮惟我弟昆叔父入官有才未試病厄其生半塗而逝流風餘澤宜在後人如何不淑壽止中身古之盛時兄不哭弟今也忽焉驚心墮涕死生隔闊道阻且長何以寫哀寓此奠觴嗚呼哀哉尚饗

祭叔母文

維元祐九年歲次甲戌閏四月辛未朔日姪翰林學士左朝奉大夫知制誥兼侍講史院修撰兼知院事兼修國史上輕車都尉賜紫金魚袋某謹以衣一襲羊一豕一清酌庶羞之奠致祭于叔母壽安縣君之靈楊氏范氏世為昏姻夫人之歸逮事祖妣配德仲父溫慈惠和垂四十年內外尊仰福祿壽考子孫衆

多克昌其家以仕以學有一于此孰不願然况於兼
之其可無憾某一去桑梓二紀半生繫官于朝屢上
歸懇願莫之遂忽焉永違瞻望西門捫膺墮涕寓此
薄奠明靈鑒之尚饗

陝府謁諸廟文

維元祐九年歲次甲戌閏四月朔日具官某敢昭告
于某神昔先王疆理天下陝在侯衛之服周召分主
諸侯以此為中由周以來千有餘歲流風遺俗猶有
存者守土之政視他郡國為難某待罪從官 天子
命以撫字陝人惟神有廟於此能使風雨時若稼穡
豐登民無札瘥盜賊不作豈惟太守得以塞責此邦
之人亦將有牲牲黍稷馨香芬苾以歌舞神惠豈不

休哉尚饗

謁先師文

惟夫子以道為萬世師自京師至于郡縣皆有廟貌
自天子至于守令皆北面祀事昔門人有言生民以
來未之有其在茲乎某受命守邦未遑寧舍謁款廟
學式遵故常不敢贊天之高譽日之明惟潔誠以告
尚饗

祭文正公墓文

維紹聖元年歲次戊戌七月庚子朔門人龍圖閣學
士左朝奉大夫前知陝州軍府事范某謹以香幣時
羞之奠昭告于太師溫國文正公道有至公德不以
力衆所同然天不可易古之聖哲以衆為師衆不我

私亦不我欺匪力可致惟誠之為伯夷之清柳下之
潔三尺之童莫不心悅如彼白日幽必見之又如雷
霆隱必聞之惟公之名溥被四海本其一心罔有內
外著之簡策發為事功加于生民澤浸無窮公初為
相夷狄咸喜公沒于府海濱來祭歷考前世名德之
宰三代以來蓋未之有某自昔從公十有七載今守
是邦歲月其邁入敬公里遺烈如在近望公墓不獲
展拜寫誠於文薦此清酌尚饗

祭資政文

維紹聖元年歲次甲戌七月庚子朔九日辛未姪龍
圖閣學士左朝奉大夫提舉亳州明道官某謹以衣
一襲羊一豕一清酌庶羞之奠敬祭于留守資政六

叔之靈昔在太尉是生五子先公為長公於弟季皇
祐進士治平賢良直言于庭大對洋洋神宗知人
登公諫府匪躬正色終以職去元豐之末擢記言動
上之嗣服光華侍從乃貳天官乃長禁林入輔大政
同德一心士夫所望方倚以相出偃藩垣奄忽以喪
其爰自幼少學于公所先公訓言視爾季父公在近
班姪後叔前並侍帷幄講讀相先公入中書繼踵玉
堂引嫌獲避士以為光公去政府姪忝再命公三改
藩姪亦告病東洛西陝同日除書謂當參省隣壤而
居不圖凶災乃以訃來會喪於洛肝隕心摧惟公事
業光照簡策炳若星漢終古不沒偃師新阡商毫故
都卜兆云吉日月其徂祇命祠宮言趨畿邑復道洛

師適及葬日往來三月痛毒于懷寫情不文維以告
哀嗚呼哀哉尚饗

哀詞

明道先生哀詞

元豐八年六月十五日卒

先生為人清明端潔內直外方其學本於誠意正心以聖賢之道可以必至勇於力行不為空文其在朝廷與道行止主於忠信不崇虛名其為政視民如子慘怛教愛出於至誠建利除害所欲必得故先生所至民賴之如父母去久而思之不忘先生嘗言縣之政可達於天下一邑者天下之式也先生以親老求為閒官居洛陽殆十年與弟伊川先生講學于家化行鄉鄙家貧蔬食或不繼而事親務養其志調贍族

人必盡其力士之從學者不絕于館有不遠千里而至者先生於經不務解析為枝辭要其用在己而明於知天其教人曰非孔子之道不可學也蓋自孟子沒而中庸之學不傳後世之士不循其本而用心於末故下可與入堯舜之道先生以獨智自得去聖人千有餘歲發其關鍵直觀堂奧一天地之理盡事物之變故其貌肅而氣和志定而言厲望之可畏即之可親叩之者無窮從容以應之其出愈新真學者之師也成就人才於時為多雖久去朝廷而人常以其出處為時之通塞既除宗正丞天下日望先生入朝以為且大用及聞其亡上自公卿下至閭巷士民莫不哀之日時之不幸也其命矣夫

誄文

康節先生誄文

維熙寧十年七月癸丑安樂先生卒洛陽士大夫皆來哭弔且歸賻門人治喪天子下詔贈先生著作郎其年十月丁酉葬于伊闕之南嗚呼哀哉乃作誄曰郡居北土命姓于燕康公之後邈矣其縣皇之家初乃遷衡漳以及先生其道大光中和之發在於明哲之性之美之才之傑不激不厲不異不同亦坦而莊亦和而恭其幽惟顯其外惟中少也志壯始強于學聖亦我同彼惟先覺直趨其奧力取其卓鶴鳴于臯鴻漸于陸厥聲載振于彼淇澳幅員之大目所未窺博覽遐觀以為吾資徜徉四方遵海而歸爰自帝

邱遷宅中土考卜澗瀍周公之宇陰陽所和可以游處初無一塵莫蔽風雨顏子陋巷原憲環堵云何不樂惟孔之苦推測天地元化之祖旁羅日月貫穿今古爰暨草木昆蟲之微細入毫末大包九圍探蹟索隱極深研幾筆之於書皇極是統以克其氣以養其勇富貴不降威武不竦豈無爵位孰可致之亦有軒冕孰能榮之不雕不樸不耀其不奇玉韞于山珠藏于淵豫章偃蹇蔽日參天莫得而用其材乃全昔之隱者或遇衰世遯迹山林其流以弊先生之隱其道彌昭唐虞之際於以逍遙龜龍游沼鱗鳳在郊豈必陳力乃光于朝先生之化被于鄉黨無有遠邇聞風心嚮來見來請各滿其望今也則亡孰為師長嗚呼哀

哉死喪之戚有生所畏疇昔臨之精爽不昧委命待
終漠然而寢惟其一心俯仰不愧明明 我后有命
自天錫之好爵賁于重泉庶幾來者景行其賢嗚呼
哀哉先生之歿自秋徂冬不聞其聲不覩其容去此
故庭就彼新宮人誰不歿名則無窮惟其令德有始
有終作此哀誄播其流風嗚呼哀哉尚饗

太史范公文集卷第三十七

